


BANKUMBU YA KUFINGA NZAMBI

 Matondo na nge, Mpangi Neville. Yayi ke monana mutindu diambu mosi ya ngitukulu samu na munu. Mu banzaka ve kuvwanda awa bubu yayi. Kasi, na nkokila yayi ya kele nkokila ya mbundana, mpe mu—mpe mu banzaka ti mu zolaka kwisa kuluta kaka na suka yayi. Mpe mu bokilaka Mpangi Neville, mpe yandi tubaka, “Mbote, ntangu yayi, kana nge ke kwisa,” yandi tubaka, “samu na yinki ve kutuba na beto kaka mwa ntangu fioti?”

² Mpe mu banzaka, mbote, kana mu kwisa, mpe kana ya lendaka salama, mu ke longa ve, kasi mu ke tuba kaka na dibuundu mwa ntangu fioti na zulu ya bima yina, mu banza, yina ke kindisa dibuundu.

³ Beto me katuka na kuvutuka kaka na—na nzietolo ya beto ya kuzomba, bampangi mpe munu, awa, mpe beto me lutisa bantangu ya mbote. Beto—beto ke vutula matondo mingi, beto nionso ke vutula matondo ti beto me fuluka, mpe—mpe beto me kuzwa niama yina beto vwandaka kuzomba. Mpe—mpe pasteur ya beto mpe munu me zaba ti nsuni ya niama kele mbote, mbote mingi. Mpe na yina beto kuzwaka ba-cerf ya mbote. Mpe mu kuzwaka ulusu mosi na ba-cerf zole. Beto me vutuka.

⁴ Mpe yayi zolaka vwanda ntangu yina mu ke longa Bidimbu sambwadi ya nsuka. Mpe ba me yidika ve yinzo-Nzambi. Mpe ya ke na kima mosi, yina me pekisa, na kusala yawu. Na yina, mu banza ti mbanza ke pesa beto mpasi, samu beto kele ve na parking ya kieleka landila lutangu ya bantu yina beto. . . yina yinzo-Nzambi ke kuyamba.

⁵ Beto ke zola kutunga yinzo-Nzambi ya malu-malu awa, mpe beto kele ntete na ndambu ya mbote ya mbongo yina beto me kutika samu na yawu, mpe—mpe samu ti beto vwanda na yinzo-Nzambi ya nene. Kasi ntangu beto vwandaka na balukutakanu yayi, na yina, beno me zaba diambu yango. Ya kele diambu mosi ya kiadi. Bantu kele ya kutelama pene-pene ya bibaka, na nganda na nsi ya mvula, mpe—mpe—mpe ya kele kaka mpasi mingi. Mpe mu ke kuzwa mpe masawula na bankundi ya munu. Ba ke tuba, “Mpangi Branham, ya ke monana ti. . .” Dokotolo mosi ya bankundi ya munu, tubaka, “Ya ke monana mutindu ti beno lendaka kuzwa kisika yankaka.” Yandi tubaka, “Ya ke sala munu mpasi, mutindu bantu ke luta kuna.”

⁶ Nkalani ya munu ya infirmière, tubaka, “Mbote, mu lutaka kuna na suka mosi na ngunga ya tanu. Ya monanaka ti beno ke vwanda kuna. . .” Mpe yandi tubaka, “Bantu vwandaka dezia me vukana pene-pene ya yinzo-Nzambi yina kuna, na ngunga ya tanu na suka. Mu zolaka vwanda kuna na ngunga ya

yivwa na ndambu.” Na yina, beno me mona, mpe ya ke kumisa mambu mpasi.

7 Mpe beto ke zola kuvwanda na yinzo-Nzambi ya nene, mpe kisika bantu nionso lendaka kuvwanda. Mpe beto ke banza ti beto ke na kuzinga na bilumbu ya nsuka, beto ke kwikila yawu. Ti kisika yina . . . Beto fwana kulonga mambu yayi—yayi—yayi na Dibuundu, yina ke na kusalama, bima yina ba zabisaka na profesu, yankaka na kati ya yawu, mafunda ya bamvula me luta. Mpe kubanda bamvula makumi zole na tanu mpe makumi tatu me luta, na yinzo-Nzambi yayi, ya ke na bima yina ba zabisaka na profesu, yina ke salama. Mpe ntangu yayi ya ke na kusalamaka. Na yina beto fwana vutukila mambu yayi, kasi beto kele ve na bisika mingi. Na yina na suka yayi . . .

8 Mazono, mu kwendaka kutala bantu mpe nionso yina, mpe mu fwana diaka kusala yankaka, na manima ya midi yayi, mpe nionso yina. Na yina mu vwandaka na bantu zolaka kusolula na munu, ntwenia ya bakala ya mbote, yina vwandaka na kidi-kidi na yintu, mpangi-bakala ya longi kuna na kilanga ya kumwangisa nsangu. Mpe mambu mingi yankaka, mpe mpangi-bakala mosi ya Norvège. Mpe—mpe beto vwandaka na mwa masolo kuna na kati ya kivinga ya manima. Mpe mu tubaka, “Mbote, ntangu yayi, beto ke basika.”

9 Mpe Mpangi Neville tubaka, “Mbote, beto ke kwenda kutuba mwa bandinga samu na kukindisa fioti Dibuundu.” Ya nte- . . .

10 Mosi ya bima ya ntete yina mu ke zola kutuba. Mu me sonika na papié awa, mwa bima yina, mu zolaka kutuba, ntangu mu ke vutuka na yinzo-Nzambi. Mosi ya bima yina mu sonikaka awa samu na lufwa ya Mpangi ya beto ya lutondo Taylor ntangu beto vwandaka ve.

11 Mpangi Taylor vwandaka kwisa na yinzo-Nzambi yayi kubanda bamvula mingi. Beto nionso me zaba yandi, mu ke kwikila. Kasi kana ya kele na banzenza awa, ya kele bakala ya kiboba ya ntalu yina vwandaka kuzwa kisika ya kuvwanda, samu beno kuvwanda. Mpangi Taylor, mbala ya nsuka mu monaka yandi ntangu yayi, tii na ntangu mu ke mona yandi diaka bakala ya ntwenia, yandi vwandaka ya kutelama kuna na kielo Balumingu tatu to yiya me luta. Yandi tubaka, “Mu ke zola kuzwa mwa babuku, Mpangi Branham. Mu ke zola kukabula babuku yayi.” Na yina beto, yandi . . .

12 Na yina mu me bakula, yandi vwandaka na diabete mpe yandi kotaka na coma, mpe zolaka ve . . . yandi vwandaka zaba ve ti yandi vwandaka na diabete. Mpe—mpe vwandaka . . . Yandi kufwaka. Yandi kufwaka ata fioti ve. Yandi me kwenda kaka kuvwanda na Mfumu Yesu.

13 Mpe yandi vwandaka mpangi-bakala ya kukwikama, mpe ya mbote, yandi vwandaka kaka na kiadi ya bantu. Mpe kiesa ya yandi vwandaka ya kumeka kuzwa kisika samu bantu

kuvwanda, ntangu ba ke kwisa na yinzo-Nzambi. Mpe beno zaba, ya lendaka salama ti, ntangu beto ke luta na Ndilu, ya ke vwanda ve mbote na kumona Mpangi Taylor kuna, yandi ke sosila beto kisika ya kuvwanda, na lweka yankaka yina?

¹⁴ Mu banza, samu na kubambuka moyo na Mpangi Taylor . . . Mu vwandaka ve awa samu na kutuba na lweka ya Mpangi Neville, na matanga ya yandi, kasi mu ke zola kutuba mpova mosi na kuvutula matondo, na mufwidi ya yandi ya kento. Mpangi-kento Taylor, mu banza, kele awa kisika mosi kuna na suka yayi, Nzambi kusakumuna ntima ya nge ya kuvedila!

¹⁵ Mpangi Taylor, kilumbu mosi yandi tubaka, “Kwisa mona munu kuna. Mu kele na mwa dizanga mu me timuna kuna na zulu, mu me tulaka mwa bambisi kuna na kati, samu beno kwisa kuloba kuna.” Ya vwandaka ntangu nionso na kiadi ya bantu yankaka. Mpe ya kele na Muntu mosi yina vwandaka na kiadi ya yandi, ya vwandaka Klisto, yina pesaka yandi mpulusu.

¹⁶ Mu banza, samu na kubambuka moyo, ntete, samu na dibuundu yayi, mutindu ya me vukana mutindu nzutu na suka yayi, beto telama kintwadi, ti beto kulumusa bayintu ya beto na ntwala ya Nzambi.

¹⁷ Tata ya beto ya Mazulu, mutindu bantu na suka yayi, mpe bantu yina me kwisa na kisika yayi samu na kusambila . . . Diboko ya nge ya nene me luta na kati ya beto mpe me baka mosi ya bampangi ya beto ya babakala ya ntalu yina beto ke zolaka, mpe beto me zaba ti Nge zolaka yandi. Mpe Nge salaka yawu na lukanu mosi, Mfumu, to ya zolaka ve kusalama mutindu yayi, na kuzabaka ti Biblia ya beto me tuba na beto, ti, “Mambu nionso ke salaka mbote na bayina ke zolaka Nzambi.” Mpe yandi vwandaka zola Nzambi.

¹⁸ Mpe beto ke tala sika na sika, na yinza yayi, mpe beto ke mona ti bivangu na mutindu nionso ke tuba na beto, ti ntoni lendaka ve kukanga yandi, samu na zulu ya ntoto yandi me sala lukanu yina Nge fidisaka yandi awa na kusala. Yandi vwandaka mpangi-bakala ya mbote, ya kuvedila.

¹⁹ Beto ke mona yawu na kati ya luzingu ya bimenina, mpe na kati ya luzingu ya mwini yina ke basika na suka samu na kupesa beto nsemo. Mpe na kati-kati ya kilumbu mwini me kuma na kati-kati ya kilumbu. Na yina na nkokila ya ke kufwa diaka, ya ke basika kaka mbasi na suka, na madidi mpe ya malu-malu, samu ya me lungisa lukanu ya Nzambi.

²⁰ Beto ke mona bafololo ke na kupamuka mpe ya ke na kukumisa ntoto kitoko mpe ya ke na kuyidika bisika ya matanga, mpe bisika ya makwela, mpe kusala kisalu ya yawu; kuzibula ntima ya yawu mpe ya ke pesa, ya mpamba, mafuta ya niosi na baniosi, mpe ya ke pesa nsunga ya mananasi na bantu ke na kuluta, mpe kitoko na muntu yina ke na kusosa yawu. Ya ke pesa nionso yina ya ke na yawu, samu na kisalu ya Nzambi, na

yina ya ke kulumusa mwa yintu ya yawu. Kasi ntangu printemps ke kwisa, ya ke basika diaka, samu ya me lungisa lukanu ya Nzambi.

²¹ Na yina na ntwala ya yinza, mpe Biblia, nsilulu, mpe Mpeve-Santu, beto lenda kusepela mingi na kati ya ntima ya beto, na kuzabaka ti Mpangi ya beto Taylor, mutindu mosi, Mfumu, yandi me lungisa lukanu ya Nzambi. Mpe kutuba ti yandi ke vumbuka diaka ve ya ke vwanda kumanga Biblia ya beto, Nzambi ya beto, mpe bima nionso yina Nzambi pesaka beto na kutala, kele kuzaba ti mvumbukulu kele. Na yina beto ke na kutala na ntwala na ntangu yina beto ke mona yandi diaka, ntangu yandi ke vwanda ntwenia mpe na mavimpi ya mbote mpe ke vwandaka diaka ve mbevo to ke kununa.

²² Sakumuna kento ya yandi ya ntalu, nkundi ya yandi ya kuvedila. Wapi mutindu beto ke kondwa bawu, ntangu ya yinda, Mfumu, mutindu beto vwandaka mona bawu ke kwenda kintwadi na kiziba, mpe kuvwanda na zulu ya mwa ba-banc kuna, kuloba, mpe kusolula, mpe wapi mutindu ba vwandaka ba-cheri ya kieleka.

²³ Mpe ntangu yayi beto me zaba ti Kilumbu mosi ya nene ke kwisa, ntangu ba-hero ya lukwikilu ke tambula na nsi ya sanduku ya nene ya lunungu, mpe Bawanzio ya . . .ke fulusa mipepe na ba-hymne ya bawu. Beto ke mona bawu diaka na kisika yina.

²⁴ Tii na ntangu yina, Mfumu, pesa beto kikesa. Sakumuna beto mpe sadisa beto. Beto ke kondwa Mpangi Taylor ntangu ya yinda, mpe muntu nionso yina ke kwisaka na yinzo-Nzambi yayi, yandi vwandaka telema kuna na kielo mpe vwandaka sosa kisika ya kuvwanda samu na muntu yina vwandaka kwisa kuwa Ndinga ya Nzambi, samu muntu yayi kuvwanda mpe yandi kuvwanda na nsayi.

²⁵ Kilumbu yina ntangu yandi lutaka na simu yina, Mfumu, mu sambilaka ti Archange ya nene ya Nzambi kutelama kuna na kielo, samu na kuzwa kisika mosi, mpe, Mfumu, mpe yandi lendaka kuvwanda. Samu ya me sonamaka na kati ya Biblia, “Bantu yina ke vwandaka na mawa samu na bantu yankaka ba ke kuzwa mawa.” Tii beto ke mona yandi, Mfumu, bika ti beto vwanda kaka na balubambuku ya mbote na kati ya bantima ya beto, tii na kilumbu yina beto ke kutana diaka na Yinsi yina yankaka. Na Nkumbu ya Yesu Klisto beto ke lombwa yawu. Amen.

²⁶ Yandi ke vwanda ve na kati ya beto ntangu ya yinda mpe na kati ya banzenza, mpe nionso yina, yina ke kwisaka na yinzo-Nzambi yayi, to na kivinga ya beto awa, samu na kusambila. Bika ti moyo ya yandi kupema na ngemba na ntwala ya Nzambi, tii na Kilumbu yina.

27 Kilumbu mosi, diaka, mosi na mosi ya beto ke kwenda, mosi na mosi, mutindu yayi tii kuna ya ke vwanda ntangu ya beto ya kukatuka na yinsi. Bika beto ntangu yayi, mutindu beto kele na ntangu, mpe beto lenda sala yawu, bika beto kukubama samu na ntangu yina ke kwisa; samu beto me zaba ve wapi ntangu ya ke vwanda. Beto me zaba ve nani ke landa. Bika beto zinga mutindu yina, ti konso kilumbu, na mutindu ti, kana ya ke vwanda ntangu ya beto, beto ke kubama.

28 Ntangu yayi, mu ke zola kupesa mwa mazabusu. Ntangu yayi, ntama ve, ntangu yankaka, mu me solula ve na ba-administrateur kubanda mu me vutuka, samu na yina me tala lutungu ya yinzo-Nzambi awa, to yina beto ke sala, samu na kukubika yinzo-Nzambi ya beto samu na kusala balukutakanu ya beto. Na yina mu ke landila, lemvo ya beno, na Bidimbu Sambwadi, na manima Bambungu Sambwadi, mpe bima mingi yankaka yina beto ke tubila, ntama mingi ve.

29 Mpe ntangu yayi, Lumingu ke kwisa na suka, kuna, mu ke vwanda na Elizabethtown, na Kentucky, na Mpangi L. G. Hoover, samu na kisalu ya mbiekolo. Mpe ya kele samu na kubieka tabernacle ya malu-malu yina ba me sumba na Elizabethtown, na Kentucky. Na kulandaka nzila 62 tii na Elizabethtown, to kuna, mu zola tuba, na 31, to na kulutaka na bala-bala ya nene na péage. Ya kele nzila yina ke twadisaka na yankaka, ya ke nata beno na Elizabethtown. Ya kele pene ya ngunga mosi. Ya kele nzila ya bitamina pene ya makumi tanu na tanu, makumi sambanu ya ba-kilomètre kuna. Mu banza, ya kele bitamina pene ya makumi sambanu, na kulutaka . . . na nzila ya 31, mpe pene ya ba-kilomètre makumi tanu na tanu, to kima mosi, kana beno landa nzila yina kuna ke luta na bala-bala ya nene na péage. Ya kele na Bala-bala Mulberry.

30 Mbiekolo. Mpangi Hoover ke vwanda na lukolo ya Lumingu mutindu yandi ke salaka yawu na ngunga ya kumi. Mpe mu ke longa na mbiekolo, kubanda ngunga ya kumi na mosi tii na ngunga ya kumi na zole, na Lumingu yayi ke kwisa, na kilumbu ya kumi na mosi na Ngonda ya kumi na mosi.

31 Kuna na tablo ya bansangu, ya kele na mazabusu samu na yawu. Mpe ya ke vwanda na . . . Beto lenda mona nzila kuna. Ya kele na Bala-bala Mulberry. To ba—ba me pesa banzila na . . . Ya kele na tablo ya bansangu kuna na ntwala ya yinzo-Nzambi.

32 Na yina, na—na Ngonda ya kumi na mosi na kilumbu ya makumi zole na zole, mu—mu fwana vwanda na Shreveport, na Louisiane, kilumbu ya makumi zole na zole, makumi zole na tatu, makumi zole na yiya, makumi zole na tanu, mpe—mpe makumi zole na sambanu. Bilumbu tanu, mu banza, na Shreveport, na Louisiane, na Life Tabernacle. Ya ke vwanda na Mpangi Moore. Ba ke sala jubilé ya bawu ya wolo. Lusakumunu ya pentecote kubwaka na Shreveport, na Louisiane, bamvula

makumi tanu me luta, kilumbu ya makumi zole na zole ya ngonda yayi. Bamvula makumi tanu me luta, ba longaka nsangu ya ntete ya pentecote. Mpe kubwaka, Mpeve-Santu kubwaka, na Louisiane. Mpe ba me kuzwa lubambuku samu na yawu, mpe yayi kele jubilé ya wolo. Mpe mu ke longa na jubilé yayi, bankokila tanu, na Mpangi Moore, na Shreveport, na Life Tabernacle.

³³ Kana beno kele na bankundi kuna, na yina, yina beno ke zola kusonikila, to kima mosi, beto ke vwanda na kiese na kuvwanda na bawu kuna. Mpe beno tuba na bawu kaka samu na balukutakanu yina ke salama na bilumbu ke kwisa.

³⁴ Mpe Life Tabernacle, kana muntu mosi me vwandaka ntete kuna na Mpangi Moore, yandi kele muntu ya mbote. Mpe ya kele na nkonga ya bantu ya mbote, bantu yayi ya Sud. Ya kele kaka mpasi na kuzwa bantu ya mbote mingi kulutila bawu. Mpe na yina, Life Tabernacle, muntu nionso na nziunga ya Shreveport lenda tuba na beno kisika ya kele. Shreveport kele na bantu pene ya nkama zole ya mafunda. Mpe ya kele mbanza mosi ya kitoko, mpe ya kele na bisika mingi ya kuvwanda. Na yina . . .

³⁵ Mpe ya kele tabernacle ya nene, tabernacle ya nene mingi. Ya kele na ba-étage, mpe ba-balcon, mpe kivinga ya nene, mpe kivinga yankaka na zulu ya yawu. Mpe ya kele kaka na bisika mingi. Mpe ya kele kaka na ntuala ya salle municipale yina lenda kuyamba bantu mafunda tanu. Ya kele kaka—kaka mutindu kuzabuka bala-bala yayi, awa.

³⁶ Mpe Révérend Jack T. Moore, to—to Life Tabernacle na Shreveport, na Louisiane. Ya ke banda na kilumbu ya makumi zole na zole. Ya ke banda na Kilumbu ya ta- . . . Kubanda Kilumbu ya yiya tii na Lumingu. Kilumbu ya yiya, Kilumbu ya Tanu, Kilumbu ya sambanu, Lumingu, bilumbu yiya na kisika ya bilumbu tanu. Beno lemvokila munu. Ya ke vwanda na kilumbu ya makumi zole na zole, makumi zole na tatu, makumi zole na yiya, mpe makumi zole na tanu. Mu banza ti ya ke mutindu yina, na—na Ngonda ya kumi na mosi.

³⁷ Na yina, beto ke mona kisika yina beto kele, samu na yinzo-Nzambi ya beto awa, samu na kumona mutindu dibuundu me kwenda na ntuala samu na lutungu ya yawu. Mitungi me tuba na beto ti ba lendaka baka bantu mingi kuna, ti na bilumbu kumi bisalu lendaka kukuma ntama na mutindu ti beto lendaka kukota, beno me mona, na nswalu nionso. Mpe ba ke vingila mbanza kundima yawu. Beno zaba, mpe beto fwana kuzwa kisika ya nene ya parking, mpe mingi ya *yayi*. Mpe, oh, la la, ya ke lomba kuluta na bankwamusu mingi, samu na kubanda kutunga konso kima yina. Kasi mu ke zola kukuma na yinzo-Nzambi na ntuala ya kuvutuka na kilanga ya kumwangisa nsangu.

³⁸ Ntangu yayi ba me bokila munu na Tanganyika, na Ouganda, bisika nionso kuna. Joseph me sala nionso samu balukutakanu yayi kubanda na Ngonda ya zole.

³⁹ Mpe mazono, ntangu mu kumaka, ya vwandaka na mwa bampangi ya babakala, mpe Mpangi-kento Thoms mpe bayankaka, yina me katuka na bayinsi ya nzenza, me kwisa. Mpe ya vwandaka . . . Mu me mona note mosi na kielo ya munu, to—to lubokilu yina me katuka na kimvuka mosi kuna na Afrique du Sud. Na yina mu ke sonikila bawu, samu na kutala yina beto fwana kusala. Ya lendaka vwanda, mutindu mu ke kwenda ntama mingi, mu lendaka kuluta fioti na Afrique du Sud, ya lendaka vwanda, na kitini ya nsuka ya Ngonda ya zole mpe Ngonda ya tatu, na bantangu yayi

⁴⁰ Mpe beto ke tula kivuvu ti dibuundu ke kubama, na yina mu lendaka baka Bansungi ya Dibuundu, na ntwala—na ntwala hiver kubanda, kana ya lendaka salama. Kana mutindu yina ve, to ya ke vwanda ntangu mu ke katuka kuna, kana Mfumu Yesu me sukinina.

⁴¹ Mu vwandaka kuwa mazono ntangu mu vwandaka, mu ke kwikila ya vwandaka mazusi, mu vwandaka kuwa bande. Mu banza ti mu kuwaka yawu ke bula awa na suka yayi. Ya vwandaka mpangi-bakala mosi ya Sud yina vwandaka . . . Mama ya yandi kwisaka na lukutakanu. Yandi vwandaka na tumeur maligne na dibebe, mpe yandi vwandaka me fikama na kivudi ya lufwa. Mpe Mpeve-Santu, na mosi ya balukutakanu me salama ntama ve, na Southern Pines, mu ke kwikila ya vwandaka kuna, to kima mosi kuna, tubaka na yandi, tubaka na yandi samu na tumeur maligne ya yandi, mpe nani yandi vwandaka, mpe kisika yandi me katuka. Mpe tubaka na yandi samu na mwana-bakala yina vwandaka retrograde, mpe yandi ke sala kisumbula, mpe ke funda yandi ti yandi me kufwa muntu na luzolo ve. Mpe mambu mingi ya mutindu yina. Mpe muntu yayi . . .

⁴² Nionso yina me salama kaka mutindu yina. Mpe cancer malin ya yandi, to tumeur maligne, mu zola tuba, me bika yandi. Na yina, tumeur maligne kele cancer, beno zaba. Na yina ya—ya me bika yandi. Mpe ba sambisaka mwana-bakala yayi mutindu muntu yina kufwaka muntu yankaka na luzolo ve, mpe bima nionso kaka mutindu Mpeve-Santu me tuba yawu. Mpe ba twadisaka yandi diaka, na Klisto. Mpe yandi salaka bande samu na yawu, mpe mu—mu kuwaka yawu kubula. Beno me sepela na mwa nzonzolo yayi ya kitoko ya ntama, ya Sud? [Dibuundu me tuba, “Amen.”—Mu.] Yandi tubaka, “Awa na Caroline ya Nord,” yandi tubaka. Oh, mu ke zolaka bawu, bantu yayi ya mbote ya Sud. Mpe yandi vwandaka . . . Mfumu landilaka kaka na kusakumuna yandi. Yandi tubaka, “Mu zaba ti nge ke tubaka ti nge ke longaka ve malongi, Mpangi Branham; kaka na dibuundu ya nge.” Yandi tubaka, “Beto kele kitini ya dibuundu

ya nge.” Na yawu yina vwandaka kieleka kitoko samu na yandi, na kutuba mutindu yina.

⁴³ Mpe ntangu yayi ya kele na foto mosi, mu banza, ntangu yankaka, ya kele na tablo ya bansangu na suka yayi. Kana ya kele ve, Billy ke tula yawu kuna. Ba ke tubaka na munu bambala mingi ntangu mu bandaka na kutubila yawu ntete, bantu vwandaka tuba, “Nge ke yindulaka kaka, Mpangi Branham, ti nge ke monaka Nsemo yina, Nsemo yina.” Ya kele kaka, na mpasi. . .

⁴⁴ Ya lendaka vwanda na bayankaka awa, biboba ya ntangu ya ntama yina ke bambuka moyo na yawu, na ntwala ba baka Yawu bafoto. Ya kele na muntu mosi awa yina ke bambuka moyo ti, mu vwandaka tuba yawu kubanda ntama? Beno tala. Pene ya maboko yiya to tanu. Mpangi-kento Spencer awa, mpe Mpangi-bakala mpe Mpangi-kento Slaughter, mpe—mpe mpangi-bakala yayi *awa*, mpe mpangi-bakala yina *kuna*. Ya kele kaka na biboba ya ntama pene ya tanu to sambanu me bikana.

⁴⁵ Mbote, ntangu yayi, na manima ya mwa ntangu fioti, disu ya mekaniki ya camera me kanga yawu foto. Na yina ba me fidisa yawu na Washington, DC mpe banganga ya mayele talaka yawu mbote-mbote, mpe tubaka, “Ya kele ve na ba-exposition zole to kima mosi.” Bawu tubaka, “Nsemo me bula objectif.” Ya kele George J. Lacy. Yandi me sonika nkumbu ya yandi na nsi. Beno me mona?

⁴⁶ Mbote, na yina, bantangu mingi beno ke kuwa munu kutuba, mu ke tala mpe mu ke tuba, “Ya ke na kivudi ya ndombe na zulu ya muntu *yayi*. Yandi kele na kivudi ya lufwa na zulu ya yandi.” Bantu yikwa me kuwaka munu kutuba mutindu yina? [Dibuundu me tuba, “Amen.”—Mu.] Na bantangu mingi, beno me mona, mbala mingi. Mbote, ya me salama ti camera me kanga yawu. Mpe na yina beto kele na yawu awa.

⁴⁷ Mama yango kwisaka na ntwala ya mpangi-kento mosi mpe tubaka na yandi diambu ya yandi, na lukutakanu ya—ya Caroline, kisika beto vwandaka na lukutakanu mosi ya kitoko na Southern Pines. Mpe kuna, mama yango vwandaka kufwa na cancer na mabele nionso zole. Mpe badokotolo tubaka ti yandi ke kufwa. Mpe mama yango niekaka mpe bakaka foto ya kento yango, kaka na ntangu mu tubaka na yandi nani yandi vwandaka mpe wapi kisika yandi me katuka. Mpe mu tubaka, “Ya kele na kivudi ya ndombe na zulu ya nge. Nge kele na kivudi ya lufwa na zulu ya nge.” Mpe mama yango bakaka yawu na foto. Mpe tala disu ya mekaniki ya camera, me baka kivudi ya lufwa.

⁴⁸ Kana beno me monaka film ya *Misiku Kumi*, mpe beno me monaka wanzio ya lufwa, wapi mutindu yandi vwandaka kwisa, kivudi yina ya ndombe, ya mudidi, ya kele na foto yayi. Mpe mu banza ti na ntangu yayi ya kele na tablo ya bansangu. Kana ya kele ve, Billy ke na kuwaka munu, na yina, yandi kutula yawu na

tablo ya bansangu. Mpe ya kele na flèche mosi ke talisa muntu yango. Mpe muntu yango, mpe yandi belukaka na mutindu ya ngitukulu. Kasi ya kele mutindu capuchon, mulinga ya ndombe me vukana kintwadi mutindu capuchon na zulu ya mama yango, mpe ya me telema na zulu ya cancer yina mutindu yayi, ya me katuka kuna. Ya kieleka, ya kele kivudi yayi ke talisa ti lufwa me kota na yandi, mpe, na cancer yayi.

⁴⁹ Mbote, wapi mutindu beno ke meka na kutuba Kieleka na bantu, ya ke vwanda na muntu mosi ke banza ti Ya kele ve Kieleka. Mpe kana beno ke tuba Kieleka ntangu nionso, na yina beno me zaba ti beno kele—beno kele ya kusungama.

⁵⁰ Mu ke na nkundi mosi yina kele mfumu ya ferme mosi ya nene, kuna na Weste. Mpe—mpe bantu yina ke talaka environnement futaka mafunda yiya ya ba-dollars samu na motoneige, samu na kutanga dikábu ya wapitis yina bikala kuna na Kiwanda ya nzadi Troublesome. Tata Jeverez yina me vwanda awa na kati ya yinzo-Nzambi, mu twadisaka yandi na Klisto, yandi vwandaka mumpani ya kieleka. Mpe beno me kuwaka munu kutuba disolo ya beto ntangu beto vwandaka tambula na mpunda kintwadi. Mpe yandi vwandaka kwikila na kima mosi ve kasi na mabanza ya Darwin. “Mpe Bébé yayi, me butuka na mwense, vwandaka buzoba.” Mpe na nkokila yina beto kumaka na kisika yina yandi ndimaka Klisto.

⁵¹ Mpe na yina tala yina bakala yayi tubaka na bawu. Yandi tubaka, “Ntangu yayi, beno fwana ve kusumba tomabilu yina, motoneige yayi.” Yandi tubaka, “mu ke tuba na beno kieleka ba-wapitis yikwa kele kuna na zulu.” Yandi tubaka, “Ya kele kumi na yivwa.” Yandi tubaka, “Ya vwandaka makumi zole- . . . Ya vwandaka makumi zole na mosi, mpe mu me kufwa zole na kati ya bawu.” Mpe yandi vwandaka tuba na garde-chasse. Ba me pesaka muswa na kufwa kaka mosi. Na yina yandi tubaka, “Ya vwandaka makumi zole na mosi, mpe mu me kufwa zole na kati ya bawu. Ya me bikana kumi na yivwa.”

Mpe yandi tubaka, “Yinga, Jeff, mu zaba ti nge me kufwa zole na kati ya bawu.”

Yandi tubaka, “Mutindu yina.”

⁵² Mbote, ba bakaka motoneige, ba kwendaka kuna na zulu, ya vwandaka na ba-wapitis kumi na yivwa. Yandi tubaka, “Billy, tuba kaka kieleka na muntu; kasi yandi ke kwikila yawu ve.”

⁵³ Na yina ya kele kaka mutindu mosi. Beno lenda tuba Kieleka na bantu, mpe kasi bawu. . . Ya kele na baluswaswanu mingi mpe—mpe baluvunu samu na mambu ya mutindu na mutindu ti bantu ke kwikila diaka ve ti beno ke tuba Kieleka ntangu beno ke tuba na bawu Kieleka. Beno me mona?

⁵⁴ Kasi beto ke vutula matondo ti beto kele na Tata ya Mazulu Yina ke siamisa Kieleka yayi na nsiamisa. Ya kele kieleka. Na yina kana yayi ke vwanda kilumbu ya munu ya nsuka na zulu

ya ntoto, . . . ti kusosa-sosa ya bantu ya science mpe banzikisa ya bantu ya science me talisa ti mu me tuba Kieleka samu na mambu yayi. Ya kieleka. Ya keke Kieleka. Na yina mu banza ti ba ke tula yawu na zulu ya tablo ya bansangu. Billy, nge keke na kati ya kivinga? Nge keke na foto yango, na diboko? Mpe kana nge keke na yawu, mbote, nata yawu awa, na yina nge lenda namika yawu awa, na yina ba ke tala yawu. Mbote, mu zaba ve. Ya ke vwanda na nsemo na—na tablo.

⁵⁵ Mpe yawu yayi—yawu yayi foto yango awa. Mu banza ti beno lenda ve kumona yawu. Kasi kaka *awa* beno lenda mona kivudi ya lufwa na mutindu ya capuchon na zulu ya yintu ya kento yango. Mpe tala nsamununu ke landa yawu *awa*, kisika mama yango bakaka foto yango, mpe kutala kana ya ke monana kieleka. Mpe yawu yina, na zulu—na zulu kuna. Ya keke kivudi ya lufwa na mutindu ya capuchon.

⁵⁶ [Mpangi Branham ke tuba na Mpangi Neville—Mu.] Nge ke mona kento yango, yina keke kuna?

Nge me monaka yawu, mu banza, Mpangi Neville, mutindu yina ve? [Mpangi Neville me tuba, “Yinga.”—Mu.] Uh-huh.

⁵⁷ Na yina, Billy ke tula yawu kaka na tablo ya bansangu, kana nge me zola, Billy. Kwisa, baka yawu, mpe kwenda tula yawu kuna na ntuala na tablo, na yina muntu nionso ke mona yawu ntangu bawu ke basika. Yandi to Doc, mosi na kati ya bawu. Ntangu yayi mu banzaka, ntangu yankaka, ya lendaka vwanda pwelele mingi ti beno lendaka kumona yawu, kasi ya keke na mudidi mingi samu na foto ya mutindu yina. Kasi yandi ke tula yawu kuna, na mutindu ti beno lendaka mona yawu, ntangu beno ke basika.

Ntangu yayi, beno bambuka moyo na mazabusu nionso.

⁵⁸ Mpe ntangu yayi, na suka yayi, mu banzaka ti ntangu yankaka ti beto ke tuba fioti na zulu ya kima mosi ke kindisa dibuundu, kima mosi ke pesa beno mingi ya . . .

⁵⁹ [Mpangi Doc Branham me tuba na Mpangi Branham, “Nge keke na nsatu ya mwinda yina?”—Mu.] Yinki nge ke tuba? [“Nge keke na nsatu ya mwinda yina na zulu ya yawu?”] Yinga, Doc, kana nge me zola. Ya ke vwanda mbote.

⁶⁰ Mu ke zola kusadila yayi awa. Mu vwandaka. . . Ya vwandaka ve na mwinda, na sabala me luta, na yina beto banzaka ti ya ke kumisa nsemo kulutila mbote bubu yayi. Mu zolaka kutuba samu na yawu, samu ya me fwanana na ndosi yina mpangi-kento kuzwaka.

⁶¹ Mu ke kukiyufula kana Mpangi-kento Shepherd keke na kati ya yinzo-Nzambi na suka yayi. Mu kutanaka na yandi na nkokila yina. Mpe ya vwandaka mbala ya ntete mu kutana na kento yango, kasi, mu zabaka ve nani yandi vwandaka. Yandi keke awa? Mu banza yandi keke ve. Yinga. Ya ke kwamisa beno, ya

ke niongisa beno kana mu ke tubila ndosi yina, Mpangi-kento Shepherd? Ya ke kwamisa nge ve, mutindu yina ve? Mbote mingi. Ya kele mbote mingi.

Mpe na ntwala beto belama na yawu, beto kulumusa diaka bayintu ya beto ntangu yayi.

⁶² Tata ya Mazulu ya kifuluka na lemvo, beto ke kumisa Nge samu na bumbote ya Nge nionso mpe mawa ya Nge. Mpe ntangu yayi, lembika beto, Mfumu, ti beto lendaka kulonguka Ndinga ya Nzambi ya moyo, mutindu Ya ke kwisa na beto na nzila ya ba-vision mpe me siamisama na Mpeve-Santu, me simbama na Biblia. Na yina beto ke sambila ti Nge ke pesa beto lubakusu, ti beto lendaka zaba yinki ke salama na bilumbu yayi ya nsuka mutindu beto ke mona bangolo ya yimbi pene-pene ya beto ntangu yayi. Bitumba, bitumba ya nsuka me kuma pene-pene na kunwana. Sadisa beto, Mfumu. Mutindu binwani ya kieleka, ya ngolo, bika ti beto telemisa ntangu nionso kinwaninu ya Lukwikilu, na Ndinga ya Nzambi, Mbele, mpe kukwenda na ntwala. Na Nkumbu ya Yesu. Amen.

⁶³ Ntangu yayi, na dibanza yina ya kukwenda na ntwala, ya bitumba, mutindu ba ke vwandaka na ndonga ya bitumba, ya kukubama samu na kunwana, bitumba ya kieleka, samu na kunwana bitumba ya lukwikilu.

⁶⁴ Mpangi-kento Shepherd awa, mpe Mpangi Shepherd, yina kele bankundi ya beto ya kieleka, mpe yina ke kwisaka na tabernacle yayi. Mpe ba kele bana ya Nzambi ya ntalu. Mpe—mpe Mpangi-kento yayi Shepherd, ntangu mu lokotaka courier ya munu, yina Billy lendaka vutula mvutu, ntangu muntu mosi ke tuba, “Beni fidisa munu bitende ya bisambu mingi.” Mpe mu ke sambilaka samu na yawu. Yandi ke pesaka mvutu na bantu yayi. Kasi ntangu ya kele mukanda ya munu mosi, mu fwana kupesa mvutu na yawu munu mosi, beno me mona. Na yina mu lokotaka courier ya munu mosi, mpe kuna mu nataka yawu na yinzo. Mpe mu bandaka na kutanga yawu, ya vwandaka tuba, “Ya me katuka na Mpangi-kento Shepherd.” Mpe ya vwandaka ndosi yina yandi kuzwaka, na—na bangonda me luta. Mpe yandi vwandaka bakula yawu ve tii na Balumingu zole to tatu me luta, ntangu mu longaka na zulu ya *Bansungi Sambwadi Ya Dibundu* yayi—yayi mpe—mpe bambuma sambwadi, na Pierre ya Zole, kisika ya me tuba, na Pierre ya Zole kapu 1, “Kubwela na lukwikilu ya beto.” Beni me mona?

⁶⁵ Ntete, lufulu, kele Lukwikilu. Ya zole, kubwela na lukwikilu ya beno, ngolo; na ngolo, luzabu; na luzabu, lembami; na lembami, mvibudulu; na mvibudulu, busantu; mpe na busantu, zola ya bampangi, lutondo ya bampangi; na manima zola, yina kele ditadi ya yintu. Bima sambwadi yayi. Bansungi sambwadi ya dibundu, beno me mona, mpe bambwetete sambwadi ya

bansungi ya dibuundu, mpe nionso yina kangama kintwadi na Mpeve-Santu.

⁶⁶ Ntangu yayi, yawu yina ya ke lomba samu na kuvwanda kisadi ya Klisto. Klisto ke tunga Dibundu ya Yandi na bansungi sambwadi ya dibuundu; Kento ya Yandi ya makwela, Muntu mosi, kento, Dibundu. Bansungi sambwadi ya dibuundu ke pesa mpe ke sala Kento ya makwela. Ba ke baka bayankaka na nsungi *yayi*, mpe bayankaka na nsungi *yina*, mpe bayankaka na nsungi *yina*, mpe nionso kintwadi, ke sala mutindu pyramide mosi.

⁶⁷ Mutindu Enoch, yina tungaka ba-pyramide, yina beto ke kwakilaka. Mpe ba me tulaka ata fioti ve ditadi ya yintu na nsongi ya yawu, samu ba losaka ditadi ya yintu. Mpe beto me talisa yawu, mutindu Malongi ve, kasi samu kaka na kubakula, kaka samu na dibuundu yayi awa. Ti yayi. . .

⁶⁸ Nzambi ke kukikumisa Yandi mosi ya kulunga kati na tatu. Yandi ke kukikumisa Yandi mosi ya kulunga na “Tata, Mwana, Mpeve-Santu,” bisalu tatu ya Nzambi mosi. Yandi ke kukikumisa Yandi mosi ya kulunga kati na “kunungisama, kusantisama, mbotika ya Mpeve-Santu,” ya kele bisalu ya kulunga, ya lemvo. Yandi ke kukikumisa Yandi mosi ya kulunga na bankwizulu tatu: ya ntete, samu na kuvulusa Kento ya Yandi ya makwela; ya zole, samu na kundima Kento ya Yandi ya makwela; ya tatu, na Millenium na Kento ya Yandi ya makwela. Mpe nionso ke kuma ya kulunga kati na tatu. Mpe sambwadi kele ntalu ya kusambila Nzambi. Ba ke sambilaka Nzambi kati na sambwadi, ya muvimba, ntangu yayi ya kulunga mpe ya muvimba.

⁶⁹ Mpe kima ya ngitukulu vwandaka, mu ke tuba yawu ve samu na kukotisa yawu, kasi kaka samu na kutalisa beno, mvudi ya nsuka yina mu kuzwaka vwandaka na bansongi tanu na lweka mosi mpe bansongi tatu na lweka yankaka; beno me mona, lemvo mpe kulunga.

⁷⁰ Ntangu yayi beno tala yayi, ya kele Klisto. Nzambi sonikaka ba-Biblia tatu. Biblia ya ntete vwandaka na zulu, yina ba bokilaka zodiake. Ntangu yayi, kana beno me zaba ve Buku ya Job, beno zimbana yawu, na yina, samu Job yina tendulaka yawu, ntangu yandi talaka na zulu mpe yandi bokilaka bankumbu ya bima yina vwandaka na zulu.

⁷¹ Mpe beno tala, na kati ya zodiake, ya ke banda na yinki? Kima ya ntete na kati ya zodiake kele mwense. Kima ya nsuka na kati ya zodiake kele Leo nkosi. Nkwizulu ya ntete ya Klisto, na nzila ya mwense. Nkwizulu ya zole, Leo nkosi, Nkosi ya dikanda ya Juda.

⁷² Na manima Enoch kusukisaka na kilumbu ya yandi, to na kilumbu yina kuna, pyramide. Mpe ya ke. . . Na yina, beto kele ve na ntangu samu na kupesa dibanza mpe kutalisa mutindu ba

tungaka pyramide yayi na bivinga mpe nionso yina. Ya ke talisa pwelele ntangu yayi ya nsuka. Ba kele ntangu yayi na kivinga ya ntinu, na bitezo ya yawu. Kasi ba tulaka ata fioti ve ditadi ya yintu na nsongi ya pyramide. Mpe ba vukisaka matadi na mutindu ya kulunga, landila mutindu ba salaka yawu, to—to lutungu ya yawu. Na mutindu, ti . . . mwa lutebo ya fioti . . . Ba me zaba ve wapi mutindu ba me tungaka yawu, ba ke bakula yawu ve, ba lendaka ve kukotisa lutebo kisika zolaka vwanda poto-poto. Mpe ya kele ve na poto-poto na kati ya yawu. Ba me kangaka yawu kintwadi, na mutindu ya kulunga.

⁷³ Na yina ya kele mutindu yina ntangu Klisto mpe Dibuundu ke kuma mosi. Ya kele ve na poto-poto na kati-kati. Ya kele ve na kima mosi na kati-kati; kaka Nzambi na muntu. Nzambi, Klisto, mpe muntu.

⁷⁴ Ntangu yayi, kasi, ditadi ya yintu, ba me kuzwaka yawu ata fioti ve. Beno me zaba Ditadi ya Scone yina ba ke sadilaka na Angleterre, samu na kubieka bantinu, to samu—samu na kulwatisa bawu yimpu ya kimfumu, mpe nionso yina. Kasi ditadi ya yintu . . .

⁷⁵ Kana beno tala mbote na zulu ya dititi ya un dollar Américain. Beno ke mona kana . . . na zulu ya dititi ya un dollar Américain, na lweka mosi, na diboko ya kikento. Ya kele na kidimbu ya Amérique, ngononi na . . . na madionga na makulu ya yandi, na lweka ya zole, ba ke bokila yawu kidimbu “ya Etats-Unis.” Kasi lweka yina yankaka kele pyramide mpe, na zulu ya yawu, disu ya nene, mpe na nsi awa ya me tuba “Kidimbu ya nene.” Samu na yinki ya ke vwanda “Kidimbu ya nene” na kati ya yinsi yayi, na zulu ya kidimbu ya yinsi ya beto? Beno me mona?

⁷⁶ Ata nionso yina beno ke sala, Nzambi ke sala ti yawu kutuba kaka. Beno me mona? Ya ke sala ti nsumuki kutubila yawu. Yandi ke sala ti yinsi kutubila yawu. Bima nionso fwana kutubila Yandi. Ata ti beno—beno ke kwikila Yawu to ve, Ya kele kaka kuna.

⁷⁷ Ntangu yayi, beno tala, ya kele na disu na kati ya yawu, disu ya Nzambi. Mpe samu ba tulaka ve nsongi yango, Kidimbu ya Ngudi, samu ba losaka Yawu, ya vwandaka Mwana ya Nzambi; Ditadi ya nsongi ya lutungu, Kidimbu ya Ngudi ya pyramide, mpe nionso yina. Ntangu yayi—ntangu yayi, mu ke . . . Mu ke zolaka ve ku . . .

⁷⁸ Bantangu yankaka ba ke baka malongi yayi na bande, mpe ya kele na kati ya bampangi ya babakala na kati ya mabuundu, na mabuundu yankaka. Mpe ntangu ya ke salama, na yina bampangi ya babakala ke bakula na mutindu ya yimbi, ti mu ke tuba yimbi ya bampangi. Kasi ya kele ve mutindu yina. Mu . . . Kana beno lendaka kaka kuwa mpe kubakula, beno me mona, mu ke tuba ve yimbi ya mpangi-bakala mosi ve. Samu,

ya kele mbote ve ti bampangi, kutuba yimbi samu na bamosi na bayankaka. Beto lendaka kutuba samu na mosi na yankaka, kasi yimbi ya mosi na yankaka ve.

⁷⁹ Kasi ntangu mu ke tubila kima mosi samu na organisation mosi, mutindu ba-Presbytérien, ba-Methodiste, to nionso yina, ba ke tuba, “Beno me mona, yandi ke telemina yawu.” Mu ke telemina ve mpangi-bakala yina kele kuna, to mpangi-kento yina kele kuna. Mu ke teleminaka systeme yina ke kabulaka kimpangi. Bana ya Nzambi kele dibuta mosi, mpe ya kele ve—mpe ya kele ve bimvuka ya kuswaswana.

⁸⁰ Mpe bayankaka na kati ya bawu ke tuba, “Mu ke na kima ya kusala na yawu ve, samu ya kele ya ba-Presbytérien. Mpe mu kele Methodiste.” Beno me mona? Ntangu yayi, ya ke mutindu yina ve. Beno me mona? Ya kele systeme ya organisation yina ke buka ngwisani na kati ya kimpangi. Beno me mona?

⁸¹ Ntangu yayi, kuna, mutindu mu tubaka yawu, kana beno vwandaka kulumuka na nzadi na kati ya masuwa ya ntama, mpe beno ke meka na kunwana na basiba, mpe mu me zaba ti ya ke simba ve, mbote, na yina, mu ke boka, samu na kunganina beno ve. Mu ke meka na kubasisa beno na masuwa yina. Beno me mona? Samu, masuwa yina ke panzana, mpe—mpe—mpe beno ke bikana, beno mosi, na kati ya masa. Na yina—na yina ya kele ve—ya kele ve samu na mpangi-bakala yina kele na kati ya masuwa mu ke boka, kasi mu ke boka na mpangi-bakala samu na kutalisa yandi yina ke zola kusalama.

⁸² Mbote, ba-systeme yayi nionso yina bantu me sala na nsalulu ya bawu ya nene ke panzana. Yawu yina. Ba fwana kuma. . . Beto fwana kuvukana, na kimpangi. Yina ke vwandaka ntangu nionso lukanu ya munu na luzingu na kumeka na kuvukisa mpe ya kele ve kupanza organisation mosi, kasi na kunata bantu na kuyambula mabanza ya bawu, mpe kuvwanda bampangi samu na Baklisto nionso me butuka mbala ya zole. Beno me mona? Ya kele, yawu yina kele dibanza. Yawu yina kisika mu me telama, mbote, ntangu yayi, kana bampangi lendaka kubakula yawu. Munu. . .

⁸³ Bampangi ya beto mingi, ata mpe na kati ya mabuundu ya Nsangu ya mbote ya Muvimba, ba ke kwikilaka ve ti ba-Baptiste mpe ba-Methodiste, mpe ba-Luthérien mpe bayankaka, kele na siansi. Kasi, ntangu yayi, ba lendaka vwnda ya kusungama. Kasi mu ke wisana ve na bawu samu na yawu. Mu ke kwikila ti nsungi yayi awa, ya Nsungi ya Luther, na kati ya nsungi yayi *awa* yina ba bokilaka, mu ke kwikila, Nsungi ya Sardes. Mpe na manima Nsungi ya Philadelphie, samu na ba-Methodiste. Mpe na manima ba-Pentecotiste, Nsungi ya Laodicée. Mu ke kwikila ti ya kele bansungi. Mpe Nzambi, na kati ya bansungi yayi nionso, bakaka bantu yina ba ponaka. Mpe kuna, mutindu Hébreux 11 me tuba, ti, “Bawu kukondwa beto ke kuma ve

ya kulunga.” Beno me mona? Kasi ntangu yayi Dibuundu me katuka *awa*, ya me kuma fioti mingi, tii Ya me kuma na nsungi ya Pentecote.

⁸⁴ Ntangu yayi, mu ke tuba mutindu yayi, samu ti beno kubaka dibanza samu na yina mpangi-kento monaka na ndosi. Mpe ndosi ya yandi me fwanana kieleka na yina mu vwandaka longa.

⁸⁵ Beno tala ntangu yayi awa, ntangu yayi, bima yayi nionso yina Pierre ya Ntete kapu ya 6 mpe nzila ya 7 me tuba na beno, kuba-. . . na lukwikilu ya beno, ya kele kima ya ntete. Ntangu yayi, mu ke tuba ti bantu ke banzaka kuzwa bangolo yayi kukondwa kubutuka mbala ya zole. Mpe mu ke kwikila ti mu salaka nsamunu mosi ya nene mpe mu tubaka, “Ya kele mutindu merle ke meka na kutula mansala ya paon na zulu ya yandi, mpe samu na kukuma paon.” Yandi lendaka ve kusala yawu. Ya fwana vwanda na mansala ya kieleka ke basika na yandi. Mansala yayi fwana basika na kati ya yandi.

⁸⁶ Mpe ntangu nionso, mpe ba ke fundaka munu ntangu nionso ti mu ke vwanda na mambu ya ngolo samu na bampangi ya beto ya bakento, samu na kuzenga bansuki, mpe maquillage na kizizi, mpe bima yayi nionso. Ba ke fundaka munu ntangu nionso ti mu ke vwanaka na mambu ya ngolo samu na bampangi ya beto ya bakento. Ya—ya kele ve ti mu ke teleminaka bawu. Mu ke tubaka ve ti kento yayi kele kento ya mbote, ti yandi kele kento ya kindumba to kima mosi. Yina kele ve dibanza ya munu. Kasi, ya kele mutindu yayi, ntangu yandi ke tula bima mingi me salama na bantu na nganda, ya ke talisa ti ya kele na bima mingi me salama na bantu na kati, beno me mona, kisika ya zolaka vwanda ya kufuluka na Klisto. Samu, nganda ke talisaka ntangu nionso yina kele na kati. “Beno ke zaba bawu na bambuma ya bawu.” Beno me mona? Mpe kisika Klisto fwana vwanda kuna na kati, mpe ya zolaka kukiyangisa mingi samu na Nzambi, mpe kukiyangisa mingi samu na bima yankaka na kisika ya pompe yayi nionso me salama na bantu, beno me zaba, bankongi yayi ya vert, mpe kutala yayi ya kimuntu, mpe bima yayi nionso. Mu ke ndimaka yawu kaka ve, mpe mu ke kwikilaka ve ti Biblia ke ndimaka yawu, na yina mu ke zolaka ti beto vwanda yina beto kele.

⁸⁷ Beno tala, ntangu yayi, kana yandi kele ve na manzaka, mpe yandi ke zola kuvwanda na yawu; kana yandi kele ve na meno, mpe yandi kele na nsatu ya yawu; kana beno kele ve na diboko, mpe beno kele na nsatu ya yawu; kana beno kele ve na bansuki, mpe beno kele na nsatu ya yawu; kana beno kele ve na bima yayi, yina kele kima yankaka. Kasi ntangu beno ke katuka meno ya beno ya kieleka, samu kaka ya ke ngenga ve mutindu ya zolaka vwanda, na yina beno me sala yimbi. Kana beno kele na bansuki ya mbwaki, mpe beno ke zola bansuki ya ndombe, mpe beno ke kwenda kuna mpe beno ke tula yawu tinta ya ndombe, kaka samu na yawu; beno me sala yimbi. Yinga, mu ke banza mutindu

yina. Kasi diambu ya ngudi. . . Ya kele ve na Masonuku samu na yawu. Kaka, samu na kuzenga bansuki ya beno, ya kele na Masonuku samu na yawu, yinga, mu ke na mingi ya yawu, na yina beto ke zola kundima ti ya kele ya kusungama, ntangu yayi.

⁸⁸ Ntangu yayi, mpangi ya beto ya kento, na ndosi ya yandi, yandi lotaka ti yandi. . . Mbote, ntete, yandi vwalanganaka. “Wapi mfunu ya kukwenda na ntwala, mpe kumeka na kunwana na luzingu, kana Nzambi ke lomba beto na kuvwanda na Mpeve-Santu mpe beto kele na Yawu ve?” Ntangu yayi, mu ke banza ve. . .

⁸⁹ Ntangu yankaka ba ke kanga yayi na bande. Kasi kana ba ke sala yawu ve. . . Kana ba ke sala yawu, ya kele samu na dibuundu kaka. Beno me mona? Ntangu yayi, mpe kana mpangi mosi kubaka bande yayi, mpe kana beno kuwa ndinga ya munu, mpangi-bakala, beno bambuka moyo, na yayi, mu ke longa kaka na dibuundu ya munu. Beno fwana ntangu nionso, kufiongonina ba-bande yayi na ntwala ya dibuundu ya beno, mpe kana beno ke zola ve ti dibuundu ya beno kuwa yawu, beno bika ve bawu kuwa yawu. Kasi mu ke meka na kutuba na mwa kimvuka yayi ya fioti awa, ti—ti Mpangi Neville na munu, na nzila ya Mpeve-Santu, ke na kumeka na ku—kutwadisa mpe kulonga bawu.

⁹⁰ Ntangu yayi, ntangu yankaka beno ke wisana ve na mambu yankaka. Na yina kana ya kele mutindu yina, kaka mutindu mu ke tubaka yawu ntangu nionso samu na muntu yina ke na kudia nsusu ya kukalinga, “Kana beno tutana na mukwa, beno ke losa ve nsusu. Beno ke losa mukwa.” Na yina beno sala ntangu nionso mutindu yina. “Kana ntangu beno ke kudia tarte ya cerise, mpe meno ya beno kututana na nzika, beno ke losa ve tarte. Beno ke losa kaka nzika.” Na yina beno sala mutindu mosi na kuwaka Yayi.

⁹¹ Ntangu yayi, mu—mu ke kwikila ti—ti ya ke samu na yina ya kele na poto-poto mingi bubu yayi, samu na Mpeve-Santu, ya kele samu ya me longama mbote-mbote ve. Mu ke kwikila ti ba me longa mbotika. . . mpe ba ke tuba kaka “mbotika.”

⁹² Kasi ya kele mutindu ba ke tuba “tomabilu.” Kasi ntangu yayi ya kele na ba-mecanicien mingi na yinzo-Nzambi yayi, mpe mu me zaba kima mosi ve samu na yawu. Na yina kana mu me sala foti bampangi, mu ke. . . Beno bambuka moyo, mu kele ve mecanicien. Ya fwana vwanda na ba-bobine, mpe ba-bougie, ba-vis platinés, ba-soupapes, mpe bima yankaka nionso, yina ke salaka tomabilu.

⁹³ Mpe ntangu ba ke zonzila mbotika ya Mpeve-Santu, ya kele na bima mingi ke tambula na Yawu. Huh? Beno me mona? Ya kele na bima mingi ke tambula na Yawu. Mpe beno tala yina mu ke banza ti Nzambi ke na kotalisa: Mpeve-Santu kele awa. Beno me mona?

⁹⁴ Ntangu yayi, Pierre tubaka, ntete, “Lukwikilu.” Ntangu yayi beno tala yawu kieleka mbote ntangu yayi. Beto ke longa yawu na mwa minuti fioti. Lukwikilu, ntangu yayi, kele kima ya ntete. Mpe beno yika na lukwikilu ya beno, ngolo; na ngolo ya beno, luzabu; na luzabu ya beno, lembami; na lembami ya beno, mvibudulu; na mvibudulu ya beno, busantu; na busantu ya beno, zola ya bampangi, lutondo ya bampangi; na manima zola. Mpe muntu nionso me zaba ti zola kele Nzambi. “Nzambi kele zola.” Beno me mona?

⁹⁵ Ntangu yayi, na yina, beto ke banda na yayi, mpe beto ke nata yawu na bansungi sambwadi ya dibuundu. Nzambi ke sala, na bansungi sambwadi ya dibuundu, Kento ya makwela samu na Klisto; na kati ya nsungi ya Philadelphie, ya Thyatire, ya Pergame, ya Smyrne, mpe ya Ephèse. Nsungi ya dibuundu, yina Yesu tubaka, “Kana—kana Bakala ya makwela kukwisa na ngunga ya ntete to na ngunga ya sambwadi, bamwense yayi nionso ke vumbuka.” Ya kieleka. Bawu vumbukaka, bamwense ya Ephèse, ya Smyrne, ya Pergame, ya Thyatire, ya Sardes, ya Philadelphie, mpe ya Laodicée. Beno me bakula yawu? Ya vwandaka na nsungi ya sambwadi, ti ntangu Yandi kwisaka mpe vumbulaka bamwense yina vwandaka ya kulala. Yina ke baka bawu nionso tii kisika yayi *awa* na nsi. Beno me mona? Samu, ya kele mutindu yayi, na kati ya bamvula, ya bansungi, Yandi me sala Kento ya makwela, me kubuta Kento ya makwela, Kento ya makwela ya luzolo na zulu ya ntoto samu na Klisto. Mpe mutindu mosi ti Yandi me kubuta Kento ya makwela yayi, Yandi me kubuta bantu.

⁹⁶ Ntangu yayi mu ke na kubasisa dibanza mosi na yayi, samu ti beno bakula ntangu beto ke zonzila ndosi ya mpangi-kento.

⁹⁷ Ntangu yayi, bima yayi awa fwana kieleka kuvwanda na kati ya Muklisto na ntwala Mpeve-Santu kutula bawu kidimbu, na ntwala yayi kukulumuka kuna na zulu samu na kusala yawu kima ya kulunga.

⁹⁸ Ntangu yayi, ndosi ya mpangi ya beto ya kento. Yandi vwandaka kukiyangisa kana yandi me kuzwa Mpeve-Santu to ve, ntangu yandi lalaka na canapé ntangu bakala ya yandi vwandaka tanga zulunale. Mpe yandi kele na bana ya fioti, mutindu mosi na munu, mpe ba ke salaka makelele ntangu nionso mpe nionso yina. Mpe na yina, yandi lalaka, pene ya minuti kumi, to kumi na tanu. Mpe yandi lotaka ndosi. Mpe yandi lendaka ve kubakula yawu, to kukutika yawu nionso kintwadi, kubanda mvula mosi me luta, mu banza, tii kuna Nsangu yayi me longama. Na yina, na ntangu mu vwandaka longa Yawu, ndosi nionso vutukaka na yandi. Mpe yandi lotaka ti yandi vwandaka sambila.

⁹⁹ Yandi vwandaka tambula, ntete, na ntwala yandi kulota, mpe yandi vwandaka kufina maboko ya yandi, mpe yandi

vwandaka banza, “Mfumu, mu kele na Mpeve-Santu? Nge lenda talisa munu. Bayankaka ke tubaka, ‘Samu ti—ti mu bokaka.’ To bayankaka ke tubaka, ‘Samu mu tubaka na bandinga ya malu-malu.’ Mpe beto ke kwikilaka na nionso yayi. Kasi mu kele kieleka na Yawu?”

¹⁰⁰ Mu ke kwikilaka na bima yayi nionso, bangolo yayi, kutuba na bandinga ya malu-malu, mpe kuboka, mpe ba-demonstration ya mutindu na mutindu. Mu ke kwikilaka na bima yayi nionso. Kasi kana beno kele na yawu kukondwa *Yayi*, kima mosi ke tambula mbote ve. Beno me mona? Ntangu yayi, beno me mona, beno me mona, beno—beno kele na envelope. Beno tala.

¹⁰¹ Mpe yandi vwandaka kukiyangisa samu na yawu, na yina yandi vwandaka ya kulala na canapé kisika bakala ya yandi vwandaka kutanga zulunale, mpe yandi lalaka.

¹⁰² Mpe yandi lotaka ti yandi vwandaka na zulu ya mongo. Mpe na zulu ya mongo yayi, ya kulutula mbote. . . Mu kele ve na papié yango na ntuala ya munu, kasi mu banza ya kele mutindu yayi. Yandi lotaka ti yandi monaka sanduku mosi ya matadi, mutindu—mutindu muludi ya yinzo, ba me tulula na zulu ya mongo yayi. Mpe bakala ya yandi vwandaka kaka na manima ya yandi. Mpe yandi monaka bakala ya nene me telama kuna, yandi me lwata bilele ya kisalu, yandi me buka bansongi ya simisi ya yandi, yandi vwandaka tiamuna masa ya kulutula bunkete yina yandi me monaka ntete ve, mpe yandi vwandaka tiamuna yawu na kati ya sanduku yayi, sanduki yayi ya matadi yina vwandaka na zulu ya mongo. Mpe sanduki ya matadi vwandaka ve kukanga masa yango. Mpe ya vwandaka panzana kuna, mpe ya vwandaka tokisa bamvindu nionso mpe bitini ya bayinti, mpe nionso yina vwandaka kuna na kati, mpe ya vwandaka tokisa yawu mpe nionso yina vwandaka tiamuka na nsi ya mongo. Mpe yawu tiamukaka na zulu ya makulu ya yandi, mpe yandi vwandaka kaka kuna na kati, kasi ya vwandaka ve kukangama na yandi.

¹⁰³ Mpe—mpe na yina yandi yifuluka samu na yinki sanduku vwandaka ve kukanga yawu, mpe bakala yango tubaka, “Yina kele ve masa. Yina kele Mpeve-Santu, mpe,” yandi tubaka, “kima mosi ve ke kanga Yawu.” Mpe yandi tubaka, na yina yandi vutukaka mpe yandi bakaka kantini yankaka ya nene, mpe ya vwandaka ya kifuluka na mafuta ya niosi, mpe yandi tiamunaka mafuta ya nionso kuna na kati, yandi tubaka, “Ntangu yayi ya ke kanga yawu.” Mpe yandi nataka sanduku yina, ya vwandaka sanduku ya matadi, ya zolaka kupanzana mpe kutiamuna mafuta ya niosi yina, kasi yawu panzanaka ve. Na nsuka yawu kangamaka kintwadi mpe kangaka yawu.

¹⁰⁴ Yandi balukaka mpe yandi bandaka na kukulumuka na mongo. Ntangu ya vwandaka kulumuka na mongo, yandi telemaka na nsi ya mongo mpe yandi talaka na manima. Yandi monaka mwa bamasa tanu ya masa yayi ya bunkete,

ya cristalline, ya vwandaka ve na nsambukila ya mikolobo na bisika nionso ya lutaka, ya vwandaka kaka na bunkete mpe ya kuvedila, ya vwandaka kulumuka na nswalu nionso. Na manima ya bandaka kukulumuka malembe. Na yina, masa yayi kuyumaka, mpe ya vwandaka kukiyufula kana yayi lendaka kuma na nsi ya mongo, mwa bamasa yayi tanu. Mpe yandi vumbukaka.

¹⁰⁵ Mu banza ti ya kele fioti mutindu yina, mutindu yina ve, Mpangi-kento Shepherd?

¹⁰⁶ Ntangu yayi, na yina mu lokotaka mukanda mpe mu zibulaka yawu, na ntwala mu tanga yawu, mu monaka ndosi ya yandi.

¹⁰⁷ Ya kele mutindu yina ba ke tendulaka bandosi. Ntangu yayi, mingi na kati ya beno me kwisaka na munu na bandosi, mpe—mpe ba ke tuba na munu samu na bandosi. Mu ke tuba, “Beno vingila fioti. Nge me tuba yawu nionso ve.” Beno me mona? Mpe mu ke vutuka na manima samu na kubaka yawu. Na yina beno lendaka ve kutuba ndosi ya beno, wapi mutindu beno ke zaba kana ntendulu kele ya mbote to ve? Beno me mona? Beno fwana, beno fwana kumona ndosi yango. Vison fwana kutalisa ndosi yango. Mpe ntangu beno ke mona ndosi yina muntu lotaka, mpe beno lenda kutuba na bawu na ntwala bawu kutuba na beno, na yina beno ke zaba ntendulu.

¹⁰⁸ Mbote, mu ke kwikila ti ya kele na Masonuku, mpe, Daniel, na ntangu mosi. Ya vwandaka mutindu yina? [Dibuundu me tuba, “Amen.”—Mu.] Yandi tubaka . . . Yinga. Mu ke kwikila ti ya kwisa kaka na mabanza. Beno me mona?

¹⁰⁹ Kasi beno ke mona ntangu nionso ndosi, ntangu yayi, kana ntendulu kele ya mbote. Ntangu muntu ke banda na kutuba na beno ndosi, beno lenda kaka kutelemisa bawu, mpe kutuba, “Beno vingila fioti. Mpe ya vwandaka na kima *kingandi*. Ya vwandaka na kima *kingandi*, mpe kima *kingandi*.”

Mpe na manima beno ke tuba, “Ya kele kaka ya kieleka.” Beno me mona?

¹¹⁰ Kilumbu yina, muntu mosi, vwandaka meka na kutuba na munu nsodi yina yandi lotaka. Yandi tubaka, “Mbote,” yandi tubaka . . .

Mu tubaka, “Ntangu yayi, mpangi-bakala, samu na yinki nge me katula kitini yina yankaka?”

Yandi tubaka, “Wapi kitini yankaka?”

¹¹¹ Mu tubaka, “Nge lotaka ti nge losaka ditadi mosi na mupepe, mpe mu bulaka yawu munduki mpe mwa bitini yankaka kubwaka na meso ya munu.”

¹¹² Yandi tubaka, “Yina kele kaka ya kieleka, Mpangi Branham.” Mpe ba me katula kitini ya nsuka, mazono. Uh-huh.

113 Yawu yina. Beno me mona? Beno me mona? Samu na yinki? Ata ti beno me tuba ve kieleka samu na yawu, kasi, beno me mona, Ya ke talisa yawu kaka pwelele, kuna, ke tuba na beno ndosi ya beno, yina beno lotaka. Na yina beno ke zaba ti ya kele kieleka.

114 Ntangu yayi, beno tala ntendulu ya ndosi ya yandi. Yandi vwalanganaka samu na Mpeve-Santu. Ntangu yayi, sunduku yina yandi monaka na zulu ya mongo, vwandaka ditadi. Sunduku ya ditadi, kele *ditadi*, “funguna.” Ntangu yayi, mutindu Yesu tubaka na kati ya Masonuku. Yandi tubaka, Pierre tubaka. . . “Nani,” Yesu tubaka, “yinki bantu ke tuba Munu, Mwana ya muntu, kele?”

“Bayankaka ke tuba ti Nge kele ‘Elie,’ mpe ‘Moise,’ mpe nionso yina.”

Mpe Yandi tubaka, “Kasi Nani beno ke tuba ti Munu kele?”

Yandi tubaka, “Nge kele Klisto, Mwana ya Nzambi ya moyo.”

115 Ntangu yayi, bantu yankaka ke tuba ntangu yayi, dibuundu ya Catholique ke tuba, dibuundu ya Catholique ya Rome ke tuba, ti ya Yandi lenda- . . . “Ditadi yina vwandaka, ti Yesu tubaka, ‘Na zulu ya ditadi yayi Mu ke tunga Dibuundu ya Munu, mpe mielo ya difelo ke kununga Yawu ve.’” Ba ke tubaka, “Ya vwandaka na zulu ya Pierre. Mpe Pierre vwandaka ditadi yina, samu *Pierre* zola kutuba ‘mwa ditadi ya fioti.’ ‘Na zulu ya mwa ditadi yayi Mu ke tunga Dibuundu ya Munu.’” Mpe na zulu ya Pierre, bawu, bilandi ya bantumwa, bawu me tunga dibuundu.

116 Na yina dibuundu ya ba-Protestant ke tubaka, “Yina kele yimbi. Ti, ya vwandaka na zulu ya Yandi mosi Yandi tungaka Dibuundu.”

117 Ntangu yayi, ya kele ve samu na kukondwa kuwisana, kasi, munu, na mutindu ya munu ya kumona yawu, bawu zole kele na kifu. Samu, yandi tungaka Yawu ata fioti ve na zulu ya Pierre, to Yandi tungaka Yawu ve na zulu ya Yandi mosi, kasi ya kele na zulu ya luzayikisu ya Pierre ya Nani Yandi vwandaka. Beno me mona?

“Nani bantu ke tuba, Munu Mwana ya muntu kele?”

“Nge kele Klisto, Mwana ya Nzambi ya moyo.”

118 “Vwanda ya kusakumuka, Simon, mwana ya Jonas. Nsuni na menga me talisa na nge yayi ve,” ya kele ve seminere, beno me mona, “kasi Tata ya Munu yina kele na Mazulu me talisa yawu na nge. Nge kele Pierre. Na zulu ya ditadi yayi ya funguna, na zulu ya luzayikisu yayi, Mu ke tunga Dibuundu ya Munu.”

119 Mpe kubanda ntangu yina, konso nsungi ya dibuundu ke vwandaka na ditadi yayi ya funguna, na zulu ya ditadi yayi ya funguna ya Laodicée.

¹²⁰ Mpe, ntangu yayi, beno lendaka ve kubasisa dibuundu ya santu. Ya kele ve na dibuundu ya santu to organisation ya santu. Ba lendaka longi Mpeve-Santu na kati ya yawu, kasi kuna na kati beno ke mona bantu ya mbote mpe ya yimbi, ba-renégat, bantu yina ke kipaka diambu ve, mpe nionso yina. Na yina organisation ke simba ve. Beno lendaka ve kutuba, “Beto kele na Yawu. Bayankaka nionso kele na Yawu ve.” Ve, tata. Mpeve-Santu me tiamuka na zulu ya bantu. Ya kele muntu na muntu.

¹²¹ Na yina, ti, ditadi, Dibuundu ya pentecote ya bilumbu yayi ya nsuka me kuzwa Mpeve-Santu, yawu yina bayankaka kuzwaka na mbandukulu. Na kati ya bansungi, bantu kuzwaka Mpeve-Santu, kasi ya kele ve na kitezo yina ba kele na Yawu ntangu yayi, samu ya kele kuvutuka ya mbandukulu. Mutindu beto monaka yawu na bamwinda, Alpha mpe Omega, mutindu ba vwandaka pelisa mwinda ya ntete; ya pelaka mingi mpe mingi diaka, mpe ya bandaka na kukuma mudidi mingi mpe mingi diaka; na manima ya me vutuka diaka. Beno me mona? Ya ntete mpe ya nsuka, mpe nionso yina.

¹²² Ntangu yayi, kasi na nsungi yayi ya dibuundu, Nsangu ke na kutiamuka na kati ya dibuundu. Kasi nzutu ya dibuundu, yawu mosi, na muvimba ya yawu mutindu . . .

¹²³ Tabernacle yayi, beto ke tuba. (Yandi ke kwisaka na yinzo-Nzambi yayi.) Tabernacle yayi kele ve tabernacle ya Mpeve-Santu. Ya kele ve na kima ya mutindu yina. Bantu yina ke kwisa na yinzo-Nzambi yayi kele ba-tabernacle ya Mpeve-Santu. Bawu kele ba-tabernacle yina ke bumbaka Mpeve-Santu, kasi ya kele ve dibuundu mutindu nzutu, kimvuka. Yawu yina, Ya ke basika na yawu.

¹²⁴ Kasi, na yina, muntu yayi vwandaka tiamuna masa, munati nsangu ya dibuundu, yina vwandaka mwangisa Nsangu na kati ya dibuundu, kasi yinki masa vwandaka salaka? Ya vwandaka kutoka samu na kubasisa mvindu nionso. Yawu yina Mpeve-Santu ke salaka, na kutokaka, Ya ke basisa nionso yina.

¹²⁵ Ntangu yayi, mafuta ya niosi vwandaka talisa zola ya bampangi, lutondo ya bampangi, nsungi yayi. Mu me katuka na kutubila yawu, beno me mona, lutondo ya bampangi, nsungi yayi beto ke na kuzinga na ntangu yayi.

¹²⁶ Ntangu yayi, beno lendaka tuba, “Tala, mu—mu—mu ke zolaka ve Mpangi Neville.” To, “Ya kieleka mu ke zolaka ve Mpangi Jones. Mu ke zolaka ve Mpangi-bakala *kingandi*,” mpe nionso yina. Kasi beno bika kaka kima mosi kusalama na yandi, mpangi, ntima ya beno ke panzana. Ya ke kufwa beno kaka. Beno me mona? Beto lendaka vwanda na lutondo ya bampangi mpe bansatu samu na mosi na yankaka. Beno me mona? Kasi kukeba yawu na kati ya kimvuka ya bantu. . .

¹²⁷ Samu na yinki beno ke kukiyangisa samu na mpangi-bakala yina? Samu beno me buka dimpa na yandi awa na autel, mutindu

beno ke sala yawu na nkokila yayi. Beno ke wisana na yandi. Beno ke pesana mbote. Beno ke sambila na yandi. Yandi kele mpangi ya beno ya bakala. Mpe yandi lendaka sala kima mosi na nzutu, yina lendaka sala ti beno wisana ve na yawu, na yina beno ke benda fioti nzutu, (yina beno lendaka ve kusala), beno ke tina yandi fioti. Kasi na kati ya ntima ya beno, kana kima mosi kusalama na mpangi-bakala yayi, to na mpangi-kento yayi, ya ke kufwa beno kaka.

¹²⁸ Mu—mu kele bakala ya kiboba. Mu vwandaka ntete ntwenia, mpe ntangu yayi mu kele kiboba. Mu me monaka yawu, kusalama, na kati ya nsungi yayi. Mu ke kuwaka bantu ke tuba, “Mu ke zola diaka ve kuvwanda na kima ya kusala na yandi.” Mpe kana kima mosi kusalama na muntu yango, ya ke kufwa yandi kaka. Yandi ke banza, “O Nzambi, mu me bika mpangi ya munu ya bakala me kwenda, kukondwa kuwisana na yandi.” Beno me mona? Beno me mona? Beno me mona? Ya kele zola ya bampangi. Ya ke monana mutindu ya ke simba ve, kasi ya ke simba. Mafuta ya niosi, ya ke simbaka.

¹²⁹ Ntangu yayi, mutindu yandi vwandaka katuka kuna, yandi vwandaka kulumuka na mongo, samu na kukwenda na nsi ya mongo, masa yayi ya nkembo vwandaka kulumuka na mongo, vwandaka tiamuka na mwa bamasa tanu. Ntangu yayi, tanu kele ntalu ya lemvo; Y-e-s-u [Na Kingelezi J-e-s-u-s—Mu.], l-u-k-w-i-k-i-l-u [f-a-i-t-h], l-e-m-v-o. Beno me mona? Tanu kele ntalu ya lemvo. Mwa bamasa tanu vwandaka tiamuka na kantini kuna na zulu, tii *awa* na nsi.

¹³⁰ Mosi na mosi ya bansungi yayi vwandaka na ditadi yayi ya funguna. Basantu me kulala, ba ke vingila, ke vingila, ke vingila, ke vingila, beno me mona, tii na nsungi yayi. Kasi ntama ve Mpeve-Santu, yina me tiamuka mpe me katuka na Klisto, ke kwisa kutula kidimbu na Dibuundu. Na yina Dibuundu ke kwenda na Enlevement. Ya ke vwanda kima ya muvimba ya Nzambi, Kento ya makwela samu na Klisto, yina ke vwanda Yintu ya bima nionso. Beno ke landa munu ntangu yayi? [Dibuundu me tuba, “Amen.”—Mu.]

¹³¹ Ntangu yayi, ya vwandaka kukiyufula. Ntangu yayi, na ndosi ya yandi, yandi vwandaka kukiyufula, “Mwa masa yayi lendaka . . . Mwa masa yayi lendaka ve kukuma na nsi?” Beno me mona? Ya vwandaka kuyuma. Ntangu yayi, na mutindu ya kele, yandi mosi. Ntangu yayi tala yina mu zola ti beno kusimba ntangu yayi. Yandi vwandaka kukiyufula samu na yandi mosi. Yandi vwandaka kukiyufula “mu kele na Mpeve-Santu”?

¹³² Ntangu yayi, mu zolaka ve kutuba yawu, mwa bilumbu fioti me luta, mu vwandaka banza ti dibuundu ke vwanda na kimpeve mingi samu na kusimba yawu. Mpe mu banza ti mu ke sala mbote na kukanga bande yayi, kasi samu mu ke zola ve ti yawu kupanzana na kati ya bampangi. Kasi beno lendaka kutuba na

bandinga ya malu-malu, beno lendaka kuboka, beno lendaka kukina, beno lendaka kubasisa bampeve ya yimbi, kusala nionso yina beno me zola, kasi kuvwanda ve na Mpeve-Santu.

¹³³ Bilandi vutukaka ve, na kusepelaka mpe na kubokaka samu bampeve ya yimbi kutumamaka na bawu, mpe Yesu . . . kuna na kati ya bawu vwandaka Judas? [Dibuundu me tuba, "Amen."—Mu.]

¹³⁴ Yesu tubaka ve, "Na kilumbu yina," ntangu Yandi ke kwisa, ti, "mingi ke kwisa na Munu mpe ke tuba, 'Mfumu, mu basisaka ve bampeve ya yimbi, mpe mu salaka ve bimangu ya nene na Nkumbu ya Nge?' Mpe Mu ke tuba, 'Beni kwenda ntama ya Munu, beno bisadi ya masumu ya nkú. Mu me zaba beno ve.'" Bima yayi kele ve bidimbu ya Mpeve-Santu.

"Beni ke zaba bawu na bambuma ya bawu."

¹³⁵ Ntangu yayi beno ke tuba, "Mpangi Branham, beto, beto lendaka tuba bandinga ya malu-malu?" Ya kieleka. Ya kele makabu ya Nzambi. Kasi makabu yina ya Nzambi, kukondwa bangolo yayi na kati ya yawu, ke vwanda ditadi ya disakuba samu na muntu ya kukondwa lukwikilu. Nzambi ke ndimaka yawu ve.

¹³⁶ *Yayi* fwana vwanda ntete. Mpe ntangu beno kele na lukwikilu, ngolo, luzabu, lembami, mvibudulu, busantu, mpe zola ya bampangi, na yina Mpeve-Santu ke kulumuka mpe ke tula beno kidimbu mutindu kima ya kulunga, mutindu mosi Yandi ke tula kidimbu na bansungi ya dibuundu mutindu kima ya kulunga. Mutindu Yandi ke salaka Kento ya Yandi ya makwela kele mutindu mosi Yandi ke salaka na muntu ya Yandi; ba me sala bawu na bisadulu ya mutindu mosi, mutindu Eve salaka na Adam, lumpanzi yina ba me baka na mpanzi ya yandi. *Yayi* kele bima ya ntete beno fwana vwanda na yawu ntete. Beni lenda ve kumekula yawu. Beni lenda ve kulandulula yawu. Ya fwana vwanda yina Nzambi me fidisa mpe yina me butuka na Nzambi. Kumekula ke nataka kaka poto-poto.

¹³⁷ Ya kele mutindu mu tubaka. Beni lendaka banza kumona buse mosi me vwanda kuna na mansala ya yembe na mapapu ya yandi, yandi ke tuba, "Beni me mona, mu kele yembe!" Yandi kele ve yembe. Yandi kele buse, voutour. Beni lendaka banza merle mosi na mansala ya paon na mapapu ya yandi, mpe yandi ke tuba, "Beni tala!?" Ya kele kima yina yandi me tula yandi mosi.

¹³⁸ Kasi ya fwana katuka na kati, mpe ya ke basisa Buklisto; Nzambi, na nzila ya ngolo ya Mpeve-Santu!

¹³⁹ Mpangi ya beto ya kento vwandaka na makulu ya kupola na masa ntangu yandi kumaka kuna na nsi. Beto nionso me zaba ti Mpangi-kento Shepherd ke vwandaka na zola. Yinzo ya yandi kele ya kuzibuka. Yandi mpe mpangi-bakala, ya vwanda clochard, mulombi, konso muntu yina, ba ke pesa yandi madia,

ba ke sala nionso ba lendaka kusala samu na kusadisa yandi. Oh! Nzambi ndimaka yawu, lufulu yina yandi kele na yawu.

¹⁴⁰ Mpe beno tala, ntangu yayi, beno simba dilongi yayi. Beno tala yina ke tambula mbote ve na—na . . . Mu ke kanga yawu na bande. Tala yina ke tambula mbote ve na Branham Tabernacle. Beno me mona, ya kele na mitindu zole ya lukwikilu. Ya kele na mitindu zole ya bangolo, mutindu mu tubaka yawu kilumbu yina. Mitundu zole ya luzabu. Mitundi zole ya lembami.

¹⁴¹ Bayankaka ke banzaka ti bawu kele na yawu, na nzila ya musiku. Yawu yina ve mutindu ya lembami yina Nzambi ke na kuzonzila. Ya kele nkadulu ya beno ya kukondwa busantu, yina beno lendaka ve kuyala, mpe bima ya mutindu yina, yina ke salaka ti beno ke dasuka na nswalu nionso, beno kuswana.

¹⁴² Mvibudulu, mpe nionso yina, ya kele na ba-parodie, faux-semblant; lukwikilu yina me katuka na yinza; ngolo yina me katuka na yinza. Ya kele na lembami yina me katuka na yinza. Bima yayi nionso me katuka na yinza.

¹⁴³ Mpe kitini ya kulutila nene ya lukwikilu ya beto kele lukwikilu ya yintu. Kuwa Ndinga, ya ke sala ti beto kuzaba Nzambi na mutindu ya yintu.

¹⁴⁴ Kasi kana Yayi, me katuka na Mazulu, oh, mpangi-bakala, kana Yawu me bula *yayi*, ya kele na lukwikilu ya busantu ya kimpeve. Na yina yinki lukwikilu ke sala? Lukwikilu yina ke zaba kaka Ndinga. Kukondwa kutala yina kima yankaka ke tuba, ya ke zaba kaka Ndinga, samu, “Na mbandukulu vwandaka Ndinga, mpe Ndinga vwandaka na Nzambi, mpe Ndinga vwandaka Nzambi.” Mpe Ndinga kele kaka Nzambi. “Mpe Ndinga kumaka nzutu mpe zingaka na kati ya beto.” Mpe ntangu Ndinga Yawu mosi me tiamuka na kati ya lukwikilu ya beto, lukwikilu ya beto ya yintu ke kuma luzayikisu ya kimpeve.

¹⁴⁵ “Mpe na zulu ya lufulu yayi Mu ke tunga Dibuundu ya Munu.” Beno me mona? Ya kele ve na zulu ya dibanza ya yintu ya kukota na dibuundu mosi, dibanza ya yintu ya Yawu; kasi na zulu ya luzayikisu, ntangu mwa bamasana yina ya lemvo me tiamukaka na kati ya lukwikilu yina ya yintu beno kele na yawu. Na yina, na zulu ya yayi, luzayikisu ya kimpeve, “Mu ke tunga Dibuundu ya Munu, mpe mielo ya difelo ke nunga Yawu ve.” Beno me mona? Ya ke talisa ti ya ke telemina Yawu, kasi ya ke nunga ata fioti ve. Oh, yinki diambu yayi ya nkembo! Ntangu yayi beno tala lukwikilu. Mwa bamasana yayi tanu . . .

Mu vwandaka na kitini ya mpemba awa, kasi mu banza yandi me nata yawu ve.

¹⁴⁶ Kasi mwa bamasana tanu beno ke mona ke kulumuka awa, ya ke kanga nionso *yayi* kintwadi. Ya kele Mpeve-Santu yina salaka dibuundu ya Ephèse. Ya vwandaka Mpeve-Santu yina butaka dibuundu ya Smyrne. Mpeve-Santu yina salaka dibuundu ya Pergame, mpe dibuundu ya Thyatire, na Bansungi ya Mudidi.

Ya kele Mpeve-Santu yina me sala Kento yayi ya makwela, Muponami yayi ba me basisa na kati ya ba-systeme nionso ya ba-denomination na kati ya bansungi, mutindu yayi. Ya kele na Muponami, Kento ya makwela ya Yesu Klisto yina ba zabaka na mantwala, yina Mpeve-Santu na kubasika, Muponami. Mpe ya kele Mpeve-Santu na nsungi *yayi*, na nsungi *yina*, na nsungi *yina, yina, yina, yina, yina* tii na nsongi, Mpeve-Santu.

¹⁴⁷ Mpe ntangu yayi mutindu na kati ya bantu, bangolo yayi mpe bima yayi, yina kele luzabu mpe lembami, ba me yika na lukwikilu ya beto. Na yina ntangu Ditadi ya nsongi ke kwisa, Mpeve-Santu ke kanga Yawu kintwadi. Ya kele mbotika ya Mpeve-Santu. Yawu yina ya kele nkufi mingi bubu yayi.

¹⁴⁸ Mu me mona awa, mu kele na mwa masonuku yina mu sonikaka awa. Beto tala. Mu yemaka kifwani mosi awa, samu na kutalisa ndosi ya yandi. Beno me mona? Beno lendaka kumona yawu kuna.

¹⁴⁹ Ntangu yayi, yina me katuka na Mpeve-Santu, yinki ke kwisa? Na yina Yandi ke pesa beno, lukwikilu ya kimpeve, lukwikilu ya kimpeve, yina kele *awa* na nsi. Na yina lukwikilu yina ya kimpeve ke zabaka kaka Ndinga. Ya vwanda konso kima yina muntu yankaka ke tuba, ya ke sala—ya ke sala kima mosi ve. Ya ke zabaka kaka Ndinga. Kana muntu mosi me tuba, “Bilumbu ya bimangu me luta.” Lukwikilu yina ke zaba kaka Ndinga. Muntu mosi ke tuba, “Ya kele ve na kima mosi mutindu mbotika ya Mpeve-Santu.” Lukwikilu yina ke zaba kaka Ndinga. Ya kele lukwikilu ya kieleka, ya kimpeve, beno me mona. Ya kieleka. Beno me mona? Ya ke zaba kaka Ndinga.

¹⁵⁰ Na yina, yina vwandaka kima ya ntete. Kima ya ntete, yina ke kwisa na beno, lukwikilu ya beno ya yintu kaka awa, ya kele Mpeve-Santu ke kulumuka na lukwikilu ya beno ya yintu, samu na kusala yawu lukwikilu ya kimpeve. Na yina lukwikilu ya kimpeve ke zabaka kaka Ndinga.

¹⁵¹ Ntangu yayi, mpe kima ya zole, ya tatu. Na yina beno ke kuzwa yina ya kimpeve, beno ke kuzwa Mpeve-Santu, yina ke tula kidimbu na bima *yayi* nionso na kati ya beno, na yina Mpeve-Santu yina ke fika *yayi*. Kubanda na lukwikilu ya beno, tii na Mpeve-Santu, ba me tula beno kidimbu kati na Klisto. Na yina beno ke kuma Mosi. Amen. (Katula munu kima yayi; ya kele na kilo mingi na diboko.) Beno me kuma mosi. Beno me mona, beno na Klisto ke zinga kintwadi. “Na kilumbu yina beno ke zaba ti Mu kele kati na Tata, Tata kele kati na Munu; Munu na kati ya beno, mpe beno na kati ya Munu.” Beno me mona? Na yina ya kele kima yina ba me tula kidimbu ya Mfumu Nzambi.

¹⁵² Ntangu yayi, ba me siamisa bawu mpe ba me pesa bawu kisika. Ntangu kilumbu yina ke lunga, ba ke kuma bana-babakala mpe bana-bakento ya Nzambi yina ba me siamisa.

¹⁵³ Beno ke bambuka moyo, kuna na Buku ya Matthieu, kapu ya 17, nzila ya Ntete tii na nzila ya 5, Yesu na zulu ya Mongo ya Nsobolo?

¹⁵⁴ Beno me kuwa *Beno Kuwa Yandi*. Dilongi yina, mu longaka kuna, pene ya mvula mosi me luta, me zabana mingi, *Beno Kuwa Yandi*. Kisika ya mwana, na ba-Ephésien 1:5 diaka, “Nzambi zabaka beto na mantwala samu na lukumu ya bana.”

¹⁵⁵ Beno me mona, ntangu mwana me butuka na dibuta mosi, ya kele ntete mwana. Kasi mwana yina vwandaka na milongi yina vwandaka kusansa yandi. Mpe kana mwana yina me—me kuma ata fioti ve mwana ya mbote, yandi ke kuma ata fioti ve kilandi. Kasi kana yandi kele mwana ya mbote, mpe mwana yina lendaka tumama na tata ya yandi, na yina mwana yina bakaka lukumu ya bana, to ba vwandaka tula yandi na kisika ya yandi. Yandi kumaka kilandi ya bima yina tata vwandaka na yawu.

¹⁵⁶ Mpe yawu yina Nzambi vwandaka sala na Mongo ya Nsobolo. Ntangu Yandi bakaka Mwana ya Yandi Mosi, na manima ba talisaka ti Yandi vwandaka Mwana ya mbote, beno me mona, mpe yandi nungaka bampukumunu nionso, Yandi nataka Yandi na zulu ya Mongo ya Nsobolo mpe fikaka Yandi na kivudi ya Yandi.

¹⁵⁷ Beno zaba, na Ngwisani ya Ntama, ba vwandaka baka mwana, ba vwandaka lwatisa yandi, bilele ya kitoko, mpe ba vwandaka talisa yandi na ntswala ya bantu. Mpe ba vwandaka salaka nkinzi ya kutula mwana na kisika ya yandi, to beto ke bokila yawu lukumu ya bana. Kuna na Galtes mu ke banza ti Paul ke bokila yawu kupesa lukumu na bana. Ntangu yayi, kasi kutula mwana na kisika ya yandi, balongi ke bakula, batangi ya kimpeve, ya Biblia, kutula mwana yayi na kisika ya yandi. Na nzonzolo yankaka, mwana vwandaka kaka mwana na lubutuku ya yandi.

¹⁵⁸ Ya kele kisika yina bantu ya beto ya ba-Pentecotiste salaka foti ya bawu. Ba ke butukaka na dibuta, na Mpeve-Santu, ya kieleka, kasi na yina beto fwana vwanda bana ya mbote, yina ba me longusa na Mulongi ya mbote. Beno me mona?

¹⁵⁹ Ntangu yayi, na ntangu ya ntama, ntangu bakala mosi, vwandaka banza na mwana ya yandi, mpe yandi vwandaka zola ti yandi vwanda mwana ya mbote, yandi vwandaka baka mulongi ya kulutula mbote yina yandi lendaka kuzwa, mulongisi ya kulutula mbote, samu yandi vwandaka zola ti mwana ya yandi kukula mpe yandi kuvwanda mutindu tata ya yandi. Beno me mona? Na yina yandi vwandaka baka mulongi ya mbote.

¹⁶⁰ Ntangu yayi, kana muntu na zulu ya ntoto lendaka banza na mulongi ya kulutula mbote, wapi mutindu Nzambi, Tata ya beto? Ntangu yayi, Yandi bakaka ve ba-évêque, ba-cardinal, mpe banganga-Nzambi. Yandi bakaka Mpeve-Santu samu na kuvwanda Mulongi ya beto. Mpe Mpeve-Santu kele Mulongi ya

beto. Mpe Yandi—Yandi kele na kati ya Dibuundu, mpe Yandi ke pesa rapport na Tata.

¹⁶¹ Mpe kana tata, to, mulongi kukwisa mpe yandi tuba, “Mbote, Tata. . .” Ntangu yayi, yandi ke baka ve mulongi yina ke zola kubaka balukumu, beno zaba, lunsala na yimpu ya yandi, mutindu beto ke tubaka. Na kutubaka, “Oh, kana mu tuba na tata kima mosi samu na . . . Mwana-bakala yina kele renégat, na mutindu nionso, kasi kana mu—kana mu tuba yawu na tata, tata lendaka pesa munu lufutu ya mingi.” Yayi kele ve mulongi ya mbote. Mulongi ya mbote kele ya kusungama, yandi ke tubaka kieleka.

¹⁶² Mpe Mpeve-Santu ke tubaka Kieleka ntangu Yandi ke kwisaka na ntwala ya Nzambi, samu na beto. Yinga. Na yina Yandi ke telama kuna. Yinki beno ke banza? Bubu yayi Yandi ke dasuka na kutuba, “Bana ya nge ya bakento bawu nionso ke na kuzenga bansuki ya bawu, kasi Nge tubaka na bawu na kuzenga yawu ve. Mabanza ya bana ya Nge ya babakala me bendama mingi na ba-organisation, ti ba lendaka ve kukanga ntima samu na mosi na yankaka. Ya kieleka. Mpe ba ke ndima *yayi* na kisika ya Yayi, mpe *yayi* na kisika ya Yayi.” Yandi ke dasuka mutindu yayi! Kasi wapi mutindu Mulongi yayi zolaka kukwisa mpe kutuba, “Oh, la la! Mwana yina kele mwana ya mbote. Yandi kele mutindu Tata ya yandi.” Oh, wapi mutindu Yandi ke zola kukwisa mpe kutuba mutindu yayi! Beno me mona?

Na yina Tata ke fuluka na lulendo, yandi ke tuba, “Yayi kele mwana ya Munu!”

¹⁶³ Yawu yina kieleka Nzambi salaka na zulu ya Mongo ya Nsobolo. Beno tala, Moise na Elie basikaka kuna. Mpe Pierre, na luzatu nionso; ya mazulu salamaka. Pierre vwandaka na luzatu, yandi tubaka, “Beto tunga ba-tabernacle tatu, mosi samu na Nge, mpe mosi samu na Moise, mpe mosi samu na Elie.”

¹⁶⁴ Mutindu yandi vwandaka tuba, Nzambi kangaka yandi yinwa. Yandi tubaka, “Yayi kele Mwana ya Munu ya luzolo na Yina Mu me tula kivuvu ya Munu. Beno kuwa Yandi.” Beno me mona? Nzambi Yandi mosi vwandaka na lweka, mpe tubaka, “Yayi kele Mwana ya Munu.”

¹⁶⁵ Moise vwandaka talisa musiku. Baprofete vwandaka talisa kieleka ya Yandi. Beto lendaka ve kuzinga na nzila ya musiku ya Yandi. Beto lendaka ve kuzinga na nzila ya kieleka ya Yandi. Mu ke lomba ve kieleka. Mu ke zola mawa, ludedomo ve. Mu lendaka ve kukeba musiku ya Yandi, mpe mu lendaka ve kulungisa ludedomo ya Yandi. Kasi mu ke na nsatu ya mawa ya Yandi. Mpe Nzambi tubaka ti musiku mpe ludedomo lungaka kati na Yandi. “Yandi kele Mwana ya Munu ya luzolo. Beno kuwa Yandi. Yandi yina. Ya kele Yandi.”

¹⁶⁶ Ntangu yayi, na Ngwisani ya Ntama ntangu ba vwandaka pesa lukumu na mwana yina, to ba vwandaka tula yandi na

kisika ya yandi na kati ya dibuta, nkumbu ya yandi vwandaka kaka ya kulunga na zulu ya chèque mutindu nkumbu ya tata ya yandi vwandaka. Yinga, tata. Ba vwandaka ve . . . Ba vwandaka na mutaku, na ntangu yina, kidimbu mosi, cachet mosi. Mpe ba vwandaka . . . [Mpangi Branham ke sala mutindu yandi ke losa maté mpe yandi me bula na chaire—Mu.] Ba vwandaka losa maté na zulu ya yawu, ba vwandaka tula yawu, ya vwandaka cachet. Ya vwandaka kaka mutindu . . . Yandi vwandaka lwata mutaku ya tata ya yandi, cachet ya yandi. Mpe ya vwandaka kaka ya kulunga mutindu yina ya tata ya yandi.

¹⁶⁷ Ntangu yayi, ntangu Yesu tumamaka, Yesu tumamaka na Nzambi, Nzambi tulaka Yandi na kisika ya Yandi, “Yandi yayi.”

¹⁶⁸ Ntangu yayi, ntangu mambele mosi me butuka na Mpeve-Santu na kati ya dibuta ya Nzambi mpe yandi me talisa ti yandi kele na bangolo yayi na kati ya yandi, ti Nzambi lendaka mona ngolo, luzabu, lembami, mvibudulu, lutondo ya bampangi, mpe busantu, na kati ya yandi, na yina Nzambi ke tula yandi kidimbu, to ke tula yandi na kisika ya yandi. Mpe, kuna, ya kele na ntangu beno ke mona bana-babakala mpe bana-bakento ya Nzambi.

¹⁶⁹ Na yina, Ephésiens 4:30 me tuba, “Benoni ngongisa ve Mpeve-Santu ya Nzambi, na yina ba me tula beno kidimbu tii na Kilumbu ya mpulusu ya beno.” Ntangu yayi, bayankaka na kati ya beno ba-Baptiste yina ke zolaka kutula na ntwala lukengolo ya Kukonda nsuka, ntangu yayi, kana beno me kuma na kisika yina, mu ke telama na beno. Benoni ke vwanda na lukengolo ya Kukonda nsuka kana beno me kuma na kisika yina.

¹⁷⁰ Kasi kana beno ke tuba kaka, kana muntu mosi ke tuba, “Mu kele mambele ya dibuundu ya ba-Baptiste. Mu kele Presbytérien. Mu kele na lukengolo ya Kukonda nsuka.” Yina kele kifu. Luzingu ya beno ke talisa ti beno kele na Yawu ve, kana beno kele ve na Yayi.

¹⁷¹ Mpe kana Nzambi me pesa beno lukumu ya bana mpe me tula beno kidimbu na Mpeve-Santu na kati ya Kimfumu ya Yandi, na yina ya kele ve na mutindu ya kubasika kuna. Benoni kele na lukengolo ya Kukonda nsuka. Benoni kwikila. “Benoni ngongisa ve Mpeve-Santu ya Nzambi na yina benoni nionso mpe bangolo ya beno ya busantu me baka kidimbu tii na Kilumbu ya mpulusu.”

¹⁷² Mu ke kwikilaka ti ya kele na Kento ya makwela yina ba zabaka na mantwala. Mu ke kwikilaka ti Nzambi tubaka ti Yandi ke vwanda na “Dibuundu ya kukondwa ditona to mifutu.” Mu ke kwikilaka na predestination, ti Kento ya makwela ba zabaka Yandi na mantwala. Yandi fwana vwanda Kuna. Mu ke na kivuvu ti Mu ke vwanda na Yandi. Yawu yina, benoni me mona, mu ke vwanda na Yandi. Ntangu yayi ya me tala munu na kusala samu na mpulusu ya munu na Nzambi, tii kuna bima *yayi* ke ndimama na Nzambi, mpe na manima ba ke tula yawu kidimbu na kati ya Kimfumu ya Nzambi. Yina kele Mpeve-Santu. Yina kele bisalu

ya kieleka ya Nzambi. “Ba me tula yawu kidimbu tii na Kilumbu ya mpulusu.”

Yawu yina vwandaka ndosi ya yandi. Mu banza ti ya vwandaka kitoko.

¹⁷³ Ntangu yayi, na yina, ntangu Yandi ke sala mutindu yina, kana Dibuundu me kuma na kisika yayi, to muntu mosi, Dibuundu ke vwanda Kuna. Beno bika mu tuba yawu pwelele samu ti beno bakula yawu. Ba zabaka Dibuundu na mantwala samu na kuvwanda Kuna. Mu ke zola kuvwanda Kuna na Yawu, kasi mutindu mosi kaka samu na munu na kuvwanda na Yawu, kele kuvwanda kitini ya Yawu. Wapi mutindu mu ke kuma kitini ya Yawu? Na kuvwandaka na kati ya Yawu. Wapi mutindu mu ke kota na kati ya Yawu? Na mbotika, na Mpeve mosi. Ba-Corinthiens ya Ntete kapu 12, “Na Mpeve mosi beto nionso me botama samu na kusala Nzutu mosi.” Nzutu mosi; ba ke kotaka na Yawu na mbotika.

¹⁷⁴ Kasi beno lendaka ve kusala bima yayi, mpe kutuba, “Mu tubaka na bandinga ya malu-malu. Mu kele na Yawu.” Beno ke basika kuna, mpe beno ke dasuka, mpe beno ke zenga ndefi, mpe beno ke tambula yimbi. Beno me mona? Ya kele kutula mansala ya paon na—na ndeke yayi geai. Beno me mona? Beno lendaka ve kusala yawu. Luzingu ya beno ke talisa ti ya kele ve.

¹⁷⁵ Kasi ntangu bima yayi ke sala na kati ya beno, na nzila ya Nzambi, na yina beno me baka kidimbu. Na yina ya kele ve kima yina ba me sala na bantu. Beno kele kaka beno mosi. Ya kele kuna ba-vision, yina kele ya kulunga, Mpeve-Santu, bisalu ya Nzambi, bima nionso, me monisama, samu (samu na yinki?) beno na Klisto me kuma mosi. Mu ke banza ti beno me bakula yawu. Beno na Klisto me kuma mosi.

¹⁷⁶ Mu vwandaka na kima yankaka mu sonikaka awa, yina mu ke zola kubanza. Ya ke nata beto kisika Luzingu kele. Na yina beno ke kuma . . . beno kele na Luzingu ya Kukonda nsuka.

¹⁷⁷ Ntangu yayi, mu kele na lexique ya ba-Grec awa, *Emphatic Diaglott*. Mu vwandaka longuka mpova mosi kilumbu yina.

¹⁷⁸ Ntangu yayi, na Jean 14, to Jean 3:16, beto ke mona, na kisika mosi ya me tuba, “kuvwanda na Luzingu ya *kukonda nsuka*.” Mpe kisika yankaka ya me tuba, “kuvwanda na Luzingu ya *Kukonda nsuka*.” Kasi na Grec, na lubangulu ya ba-Grec . . . Na ba-Hebreux, ya me tuba, “Luzingu ya *kukonda nsuka*.” Na mpova ya ba-Grec, ba ke sonikaka yawu a-i-n-i-o-a-n.

¹⁷⁹ Kaka mutindu “*aeon*.” *Aeon* kele “kitamina” yina lenda ve, ntalu yina ba lendaka ve kutanga. Ya kele na zulu ya ba-million, ba-billion, ba-milliard.

¹⁸⁰ Kasi awa ya kele ba-*aionios* ya ntangu, Luzingu ya Kukonda nsuka. Mpe mpova ya Kingelezi samu na yawu kele Kukonda nsuka. Beto me zaba yawu mutindu ya Kukonda nsuka, *aionios*,

to “Luzingu ya kukonda nsuka.” Beno me mona? Mpe kana beno kele na Luzingu ya kukonda nsuka, wapi mutindu beno ke kufwa? Beno me kuma kitini ya Kukonda nsuka. Mpe ya kele kaka na kima mosi ya Kukonda nsuka.

¹⁸¹ Satana kele ve ya Kukonda nsuka. Ve. Yandi—yandi kumaka Satana. Difelo kele ve ya Kukonda nsuka. Difelo ba salaka yawu. Ya kele ve ya Kukonda nsuka. Mpe banzutu ya beto kele ve ya Kukonda nsuka. Ba salaka yawu.

¹⁸² Kasi Mpeve ya Nzambi kele ya Kukonda nsuka. Yawu kuzwaka ata fioti ve mbandukulu, to Ya kele na ata fioti ve na nsuka. Mpe mutindu mosi kaka beto lenda kuzwa Luzingu ya Kukonda nsuka, na mpova yayi Grec, Zoe, yina zola kutuba, “Luzingu yina ya Nzambi,” beno kele na yawu, beto kukuma kitini ya Nzambi ntangu beto ke kuma bana-babakala mpe bana-bakento ya Nzambi, mpe beto kele na Luzingu *aionios*. Na yina kitini yina ke zinga, beto, yina ke zaba Ndinga yayi, kubanda *awa* tii *kuna*, yina ke zaba Yawu, kele Luzingu *aionios*, “Luzingu ya kukonda nsuka.” Ya kele Luzingu ya Nzambi Yandi mosi na kati ya beto. Amen. Fiou!

¹⁸³ Kilumbu yina, na nzietelo mosi, mu vwandaka solula, na Témoin de Jehovah mosi. Ntangu yayi, mu ke tuba yawu ve samu na kuvweza kundima ya muntu mosi. Beto kele na ba-Témoin de Jehovah mingi yina me balulaka ntima awa, na kati ya beto. Mosi ya ba-administrateur ya dibuundu ya beto vwandaka Témoin de Jehovah, *vwandaka*, mpe yandi me kuzwa mpulusu, yandi na dibuta ya yandi. Tata ya yandi vwandaka mutangi; Mpangi Wood mpe bayankaka. Ntangu yayi bampangi ya yandi nionso ya babakala mpe ya bakento, na kutala bawu nionso me kwisa, ba me kuzwa Mpeve-Santu, samu na ba-vision ya Nzambi yina me talisa yina ba salaka. Mpe yina bawu. . . Beno me mona? Yawu yina me sala yawu.

¹⁸⁴ Ntangu yayi, kasi awa, na kati ya buku ya ba-Témoin de Jehovah, ya me tuba ti pema yina beno ke na kupema kele moyo. Ntangu yayi, yina lendaka ve kuvwanda ya kieleka. Pema yina beno ke na kupema kele moyo ve. Kana ya kele mutindu yina, beno—beno ke vwanda moyo na ntangu mosi, beno ke vwanda muntu yankaka, samu beno me pema moyo yina. Beno tala kisika ya ke nata beno. Ntangu yayi, pema kele mupepe, mpe mupepe kele yina beno ke pema na kati ya mabulu ya mbombo ya beno.

¹⁸⁵ Ntangu yayi, ba ke bakaka Masonuku yina ke tubaka, “Mpe Nzambi pemaka Pema na kati ya mabulu ya mbombo ya yandi, mpe yandi kumaka moyo yina ke zinga.” Ntangu yayi, mu ke zola kuyufula beno kima mosi. Kana yandi vwandaka muntu, wapi mutindu ya pema yina yandi vwandaka kupema na ntwala Nzambi kupema Pema ya Yandi ya Luzingu na kati ya yandi? Beno me mona? Wapi mutindu ya mupepe? Yandi vwandaka pema, muntu yina vwandaka zinga. Mbote, na yina, kana ya kele

mutindu yina, na yina niama nionso kele moyo yina ke zinga, samu ba ke pemaka moyo ya muntu, mpe mioyo ya beto, mpe nionso yankaka. Na yina Yesu zolaka ve kufwa. Munkayulu ya baniama zolaka vwanda ya kulunga. Beno me mona? Na yina, mpangi-bakala, nsamunu yina ke simba ve.

¹⁸⁶ Kasi yinki Nzambi salaka, Yandi pemaka Pema ya Luzingu ya Kukonda nsuka, amen, na yina yandi kumaka moyo yina ke zinga, moyo yina lendaka kufwa ve. Ntangu yayi beno tala. Beto ke kota na kati ya mafuta ya niosi, tii na bikoso. Beno tala. “Yandi pemaka Pema ya Luzingu ya Kukonda nsuka na kati ya mabulu ya mbombo ya yandi, mpe yandi kumaka moyo ya Kukonda nsuka.” Samu, Nzambi pemaka, ya kele ve yina yinza salaka, kasi yina Nzambi salaka, Yandi pemaka Pema ya Luzingu ya Kukonda nsuka na kati ya mabulu ya mbombo ya yandi, mpe yandi kumaka moyo yina ke zinga.

Na yina beno ke tuba na munu, “Adam kufwaka, Mpangi Branham.”

¹⁸⁷ Kasi beno bambuka moyo, na ntwala Adam kufwa, yandi vwandaka na mwana-dimeme yina vulusaka yandi. Alleluia! “Bayina Yandi zabaka na ntwala, Yandi bokilaka bawu.” Yandi vwandaka na mwana-dimeme samu na kusumbulula bawu. Yandi vwandaka kifwanukusu. Adam kubwaka. Na yina mwana-dimeme pesamaka samu na Adam, samu ntete na kati ya mabulu ya mbombo ya yandi kuzwaka Pema ya Nzambi ya Kukonda nsuka, mpe yandi kumaka moyo yina ke zinga. Yandi vwandaka mwana ya Nzambi.

¹⁸⁸ Ya kele ve pema ya yandi, na mutindu ya mpova ya Afrique. Mu me zaba ve yina mpova ya ba-Grec me tuba samu na yawu, ntangu yayi. Kasi mpova ya Afrique, ba ke bokilaka yawu *amoyah*, yina zola kutuba, “mupepe; ngolo yina ke monanaka ve.” Baniama ke pemaka amoyah. Bansumuki ke pemaka amoyah.

¹⁸⁹ Na yina samu na yinki beto ke sala kingolo-ngolo samu na Luzingu ya Kukonda nsuka, kana yina ke kotaka kati na beto na kupema kele moyo ya Kukonda nsuka? Samu na yinki beto ke sala kingolo-ngolo samu na Luzingu ya Kukonda nsuka? Ya ke vutukila nge, mpangi. Beno me mona? Ya—ya—ya lendaka salama ve.

¹⁹⁰ Kasi, Nzambi, mingi-mingi na zulu ya Adam, pemaka Pema ya Luzingu ya Kukonda nsuka, mpe yandi kumaka muntu ya Kukonda nsuka na Nzambi. Yandi vwandaka na ngolo mutindu Nzambi. Yandi vwandaka nzambi ya fioti. Yandi vwandaka nzambi na zulu ya ntoto; Nzambi ya Mazulu ve, ntangu yayi. Nzambi ya ntoto!

¹⁹¹ Mpe kilumbu mosi bana ya Nzambi ke kuma diaka banzambi. Yesu tubaka mutindu yina. “Ba me sonikaka ve na musiku ya beno, ‘Beno kele banzambi’? Na yina kana beno lenda

bokila banzambi bayina Yandi bokilaka, bayina Nzambi me kwisa kutala, wapi mutindu beno lendaka fundisa Munu, na kutuba, ntangu Mu ke tuba ti Mu kele Mwana ya Nzambi?" Beno me mona? Ntangu yayi beto ke kota na kima mosi ya mudindu. Ntangu yayi beno tala yayi ntangu beto ke kotisa musonso.

¹⁹² Ntangu yayi, yawu yina. Yandi kele ntangu yayi mwana ya Nzambi, kasi yandi ke salaka kifufu. Yandi me zaba ti yandi ke sala yimbi. Ntangu yayi beno bambuka moyo, ba vunaka ve Adam. Biblia me tuba mutindu yina. Timothée ya Ntete kapu 3. "Ba vunaka ve Adam, kasi ba vunaka kento, yandi kubwaka na disumu." Adam kwendaka na Eve, samu ya vwandaka kento ya yandi.

¹⁹³ Mutindu mosi Klisto, Satana vunaka Yandi ve, kasi kwendaka na Kento ya makwela na lufwa. Yandi kwendaka samu na kuvwanda na Kento ya makwela, na yina Yandi lendaka ve kuvulusa Dibuundu.

¹⁹⁴ Adam zabaka ti yandi salaka yimbi, na yina yandi kwendaka kaka na Eve. Beno me mona? Kasi ya vwandaka na mwana-dimeme yina ba pesaka samu na bawu, samu na kuvulusa bawu.

¹⁹⁵ Mpe bana-mameme, bubu yayi, yina ba zabaka na ntwala na Nzambi, mpe yina Nzambi bokilaka, ya kele na Mukudi. "Muntu mosi ve lenda kwisa na Munu kana Tata ya Munu me benda yandi ve. Mpe bayina nionso Tata pesaka Munu ke kwisa na Munu." Ya kele kieleka? [Dibuundu me tuba, Amen.—Mu.] Na yina ba pesaka Mwana-dimeme, kubanda mbandukulu ya yinza, kisika batulaka bankumbu ya bawu na Buku ya Luzingu ya Mwana-dimeme. Ba pesaka Mwana-dimeme, samu na kusala nzila ya lemvo samu bawu nionso kuvwanda na mvumbukulu, ba me pesa Mwana-dimeme mosi; mwana-dimeme ya Adam, beno tala, kaka mutindu ba pesaka mwana-dimeme samu na Adam.

¹⁹⁶ Ntangu yayi, ya kele Dibuundu bubu yayi. Mu ke zola ve kutuba yinzo-Nzambi. Beno me zaba yawu?

¹⁹⁷ Mu ke tuba yawu ve samu na kuvweza, mpe mu ke tuba yawu ve samu na kulwadisa bansatu ya muntu mosi. Mu kele awa ve samu na kusala yawu, mutindu mu me tendula yawu munu mosi. Mu kele awa samu na kusadisa, kasi yina mu ke meka na kusala . . .

¹⁹⁸ Beno me zaba yinki? Kasi, bayinzo-Nzambi yina nionso kele ve mabuundu. Ya kele kaka na Dibuundu mosi. Ya kele ba-club. Beno me mona? Ya kele ba-club. Mu ke telemina yawu ve . . . Ya kele mbote mingi. Kasi mu—mu ke zola kutalisa na beno, na mwa minuti fioti, ti ya kele kaka ba-club. Beno kele mambele ya club ya ba-Methodiste, ya club ya ba-Presbytérien, to ya club ya ba-Pentecotiste, nionso yina. Yinga, uh-hum. Ba-club! Beno me mona? Beno lendaka ve . . . Beno me mona? Bayinzo-Nzambi kele kaka ba-club kisika bantu yina kele na mabanza mosi ke vukanaka.

199 Kasi Dibuundu kele Mosi. Mpe beno lendaka ve kukota na Dibuundu. Beno ke butuka na kati ya Yawu. Mpe ntangu beno me butuka na kati ya Yawu, beno kele mambele ya Yawu.

200 Kaka mutindu dibuta ya munu. Mu ke vwandaka na kati ya dibuta ya Branham kubanda bamvula makumi tanu na tatu. Ba me lombaka munu ata fioti ve na kukota dibuta yango. Samu na yinki? Mu fwana ve kukota na dibuta yango. Mu me butukaka Branham.

201 Mpe beno me butuka na kati ya Dibuundu. Ntangu yayi, yayi yankaka kele ba-club. Beno me banzaka yawu ntete ve? [Dibuundu me tuba, "Amen."—Mu.]

202 Kilumbu mosi mu vwandaka zenga matiti, mpe mu vwandaka banza samu na, mbote, "Dibuundu ya nene ya santu ya Catholique," mutindu ba ke bokilaka yawu. Mu vwandaka kuna mutindu yayi, ke zenga matiti.

203 Mpe Kima mosi telemisaka munu, na mbala mosi, mpe tubaka, "Kubokila yawu ve mutindu Yina." Mu talaka na nziunga. Mu bandaka na kuzenga matiti. Yawu telemisaka munu diaka, mpe tubaka, "Kubokila yawu ve mutindu Yina." Ya tubaka, "Ya kele ba-club, mutindu bayankaka. Ya kele ve Dibuundu. Ya kele kaka na Dibuundu mosi." Beno me mona? Ba kele bamambeke ya club, samu beno lendaka kukota na club. Kasi beno lendaka ve kukota na Dibuundu. Dibuundu, beno me butuka na kati ya Yawu. Beno me kuma mambele ya Yawu na nzila ya Lubutuku ya malu-malu, na beno ke kuma mambele ya Dibuta, mpangi-bakala to mpangi-kento na kati ya Yawu.

204 Ntangu yayi beno bika mu tangila beno kima mosi awa na *Emphatic Diaglott* awa, kuna, na Apocalypse 17:3, mpe Apocalypse ya *Emphatic Diaglott* awa. Mpe beno tala mbote yina ba me tuba kuna, wapi mutindu—wapi mutindu ya ke fwanana mbote-mbote na yayi. Apocalypse 16, 17. Mbote mingi. Ntangu yayi beto tanga awa na mwa minuti fioti. Beno kuwa yayi, mbote-mbote, Apocalypse 17:3.

*Mpe mosi ya Bawanzio SAMBWADI YINA simbaka . . .
Bambungu SAMBWADI kwisaka mpe tubaka na
munu, . . .*

205 Mu ke tangila beno yawu, na *Lexique*. "Yina simbaka . . ."

*. . . "Kwisa, mu ke talisa na nge KITUMBU ya KENTO YINA
YA KINDUMBA, yina kele ya kuvwanda na zulu ya Bamasa
ya Nene;*

206 Mpe beto nionso me zaba ti ya kele Vatican. Beto kele awa na *Notre Visiteur Du Dimanche*, yina dibuundu ya Catholique sonikaka, yina ke tuba na beto ya kieleka ya kele yawu yina. Beno me mona?

207 Mpe samu na kupesa mvutu na yayi, ba tubaka na munu, ti, "Kasi beno vingila fioti." Yandi tubaka, "Ya

vwandaka na bankumbu ya mutindu na mutindu,” yandi tubaka, “yina lendaka sala nkama sambanu na makumi sambanu na sambanu.”

Mu tubaka, “Kasi vingila fioti.”

Yandi tubaka, “Nkumbu ya nge lendaka sala nkama sambanu. . . .”

208 “Kasi,” mu tubaka, “Kasi, mu kele ve ya kuvwanda na zulu ya miongo sambwadi, samu na kuyala yinza, beno me mona.” Uh—huh! Beno me mona? Ya kieleka. Beno me mona?

209 [Mpangi Branham ke na kutanga Apocalypse 17:1 ya *Emphatic Diaglott*—Mu.]

. . . ke talisa nge KITUMBU ya KENTO YA NENE YA KINDUMBA, yina kele ya kuvwanda na zulu ya *Bamasa ya Nene*;

210 *Bamasa*, Apocalypse 17:15, ya kele “makanda ya bantu mpe bankonga ya bantu.” Beno me mona?

ya kele na yandi BANTINU ya YINZA me sala kindumba, mpe BANTU ya YINZA me lawuka VINU ya . . . KINDUMBA ya yandi.

211 Yinki ntangu yayi?

Mpe yandi nataka munu, na Kimpeve, na kati ya Ntoto ya kuyuma; . . .

212 *Emphatic Diaglott* ntangu yayi. Beno me mona?

. . . mpe mu monaka Kento mosi ya kuvwanda na zulu ya niama ya mbwaki, yina vwandaka ya kifuluka na Bankumbu ya Kufinga Nzambi, . . .

213 Ntangu yayi, na lubangulu ya Ntinu Jacques, ya me tuba, “ya kifuluka na bankumbu ya luvwenzo.” Beno vingila fioti, mpe mu ke baka yawu awa, na mwa ntangu fioti. Apocalypse, kapu ya 3. Mbote mingi, yawu yayi. Mbote mingi. Apocalypse, mu zola tuba 17, 7 ve; 17, beno kuwa ntangu yayi na nzila ya 3.

Mpe yandi nataka munu na kimpeve na ntoto ya kuyuma: mpe mu monaka kento mosi me vwanda na zulu ya niama ya mbwaki, yina vwandaka ya kifuluka na bankumbu ya luvwenzo, . . .

214 Ya kele mutindu yina ba me tuba yawu na Kingelesi. Kasi lubangulu ya kieleka ya Grec yina kele na *Diaglott* ke talisa yawu mutindu yayi, na Apocalypse 17:3. Beno kuwa.

Mpe yandi nataka munu, na Kimpeve, na Ntoto ya kuyuma; mpe talisaka munu Kento mosi me vwanda na zulu ya Niama—Niama ya mbwaki, yina vwandaka ya kifuluka na Bankumbu yina ke na kufinga Nzambi, . . .

215 Ya kele na luswaswanu ya nene, kati-kati ya “bankumbu ya luvwenzo” na “bankumbu ya kufinga Nzambi.” Yinki ya kele? Mpe beto . . . Ntangu yayi, yandi vwandaka:

. . . *MAMA YA BAKENTO YA KINDUMBA* . . .

216 Beto nionso me zaba yawu. Kasi yinki ya kele? [Muntu mosi me tuba, “Dibuundu ya Catholique ya Rome.”—Mu.] Ya ke lomba ve kuvwanda . . . Mbote, ya kieleka, ya ke kotisa dibuundu ya Catholique ya Rome. Kasi yandi kele “ya kifuluka na bankumbu ya kufinga Nzambi,” Methodiste, Baptiste, Presbytérien, Luthérien, bawu nionso ke tuba ti bawu kele, “mabuundu ya Nzambi.” Bankumbu ya kufinga Nzambi! Ya kele na luswaswanu ya nene kati-kati ya “bankumbu ya luvwenzo” mpe “bankumbu ya kufinga Nzambi.” Ba ke kukibokila bawu mosi, “Dibuundu ya Nzambi,” mpe ba ke kukitalisa bawu mosi mutindu yina na ntuala ya yinza; mpe bansaka ya bakalati, malafu, mpe mambu ya yimbi, mpe bamadia ya nkokila kisika ba ke pesaka supu, mpe nionso yina, kisika ba ke salaka nionso.

217 Ya kele kaka na Dibuundu mosi. Beno me butuka na kati ya Yawu. Ba ke kotaka na Yawu ve tii kuna beno ke sukula na Menga ya Mwana-dimeme mpe ba ke tula beno kidimbu na Mpeve-Santu.

218 Yawu yina luswaswanu kati-kati ya “bankumbu ya luvwenzo” mpe “bankumbu ya kufinga Nzambi.” Beno me bakula yawu? [Dibuundu me tuba, “Amen.”—Mu.]

219 Mu me simba yawu na suka yayi ntangu mu vwandaka tanga awa, . . . Ntangu mu vwandaka kwisa awa, Kima mosi me tuba na munu, “Kwenda na bureau ya nge. Baka *Diaglott*.”

220 Mbote, samu na kutumama kaka. Yawu yina. Mu kotaka. Mpe mu bakaka Apocalypse 17. Mu banzaka, “Samu na yinki Nge ke zola ti mu tanga yayi?” Mu bandaka na kutanga. [Mpangi Branham me fina misapi ya yandi—Mu.] Na yina mutindu mu monaka yawu, “Yawu yayi.” Mu bakaka kilapi mpe mu sonikaka yawu. Mu tubaka, “Yawu yayi.”

221 Ntangu yayi, bantu ke bokutaka samu mu ke teleminaka ba-organisation. Ya kele bankumbu yango ya kufinga Nzambi, yina bawu mosi ke bokilaka, “mabuundu ya Nzambi, mpe mabuundu ya Klisto, mpe mabuundu ya ba-Methodiste, mpe nionso yina.” Ya kele ba-club, mabuundu ve.

222 Ya kele kaka na Dibuundu mosi, ya kele Dibuundu ya Mfumu Yesu Klisto. Mpe yinki Yawu kele? Nzutu ya mansweki ya Yesu Klisto yina ke na kusala kisalu na zulu ya ntoto, yina me salama na bamambeke ya ba-assemblée konso yina, ya bayina ke zola kuvwanda bamambeke ya Nzutu ya Klisto. Beno fwana kubutuka na kati ya Yawu, ba ke kotaka na Yawu ve.

223 Mpe kukota na bayina, ya kele bankumbu ya kufinga Nzambi, kento yayi. Kento yayi, ngolo ya yandi!

224 Mpe beno me mona ntangu yayi ti ba ke zola kubaka bayina nionso kele na mabanza ya kimuntu-kimuntu samu na nsambulu, samu na kufidisa bawu na Alaska. Beno me mona yawu. Bakundima ya beto nionso.

225 Mpe yinki ya kele? Conseil, Conseil ya Mabuundu ya Yinza ya muvimba mpe ba-Catholique kele na kimvuka ya bawu ya nene na Vatican na ntangu yayi, kuna, ba ke na kumeka. Mpe ba-évêque yayi, mpe nionso yayi, ba ke meka na kuwisana, samu na kunwanisa communisme. Yinza ke na kunwanisa communisme, mpe ba ke na kukota na malongi ya Catholique.

226 Ya kele kaka mutindu ya kele bubu yayi. Beto yayi, mutindu mu tubaka. Beto ke kwenda. . . Beto kele diaka na kima mosi ve. Beto ke na kudefa, beto ke basisa mbongo ntangu yayi, na bampaku yina ba ke futa na manima ya bamvula kumi na yiya. Beto me kuma kisika yina. Nani kele na mbongo ya yinza? Dibuundu ya Catholique. Samu na yinki ba ke difisa yawu na Etats-Unis? Samu na kukeba bakompani ya fumu mpe ya wisiki mpe nionso yina. Ya kieleka, ba ke defisa bawu yawu. Ntangu ba ke sala yawu, ba ke kuteka bamuswa ya bawu ya bukuluntu, kuna, na dibuundu ya Catholique ya Rome. Beto ke na kuvukana. Beno tala mbote yayi, pwelele kulutula kutanga zulunale. Yawu yayi. Beno me mona?

227 Ba kele ba-Methodiste, ba-Baptiste, ba-Presbytérien, mpe nionso yina, ba ke kukibokila bawu mosi, “Dibuundu ya Nzambi.” Catholique mpe bima yina nionso kele ngolo yayi ya niama ya kifuluka na bankumbu ya kufinga Nzambi. Kubokila beno, “Mu kele. . .” Mu tubaka. . .

228 Mu kwendaka na lupitalu awa, ntama mingi ve, mu kwendaka sambila samu na muntu mosi. Mu tubaka, “Beto ke. . .” Ya vwandaka mama ya munu. Mu tubaka, “Beto ke zola kusambila samu na mama.”

Mpe mama yina tubaka, “Beno benda rido yina.”

Mu tubaka, “Nge kele ve Muklisto?”

Yandi tubaka, “Beto kele ba-Methodiste.”

229 Mu tubaka, “Matondo na nge. Mu banzaka ti nge zolaka vwanda mukwikidi.” Mu bendaka kaka rido yango pene-pene ya munu. Beno me mona? Na yina nge kele ve Muklisto, yina kele luswaswanu. Beno me mona?

230 Kasi, “Beto kele ba-Methodiste,” yina kele luvwenzo. Niama, mabuundu, yina ba ke bokilaka mabuundu, ya kele ve mabuundu. Mu ke zola zaba kana ba me baka yawu na bande. Yinga. Yawu kele ve mabuundu. Yawu kele ba-club. Bantu ke kotaka na yawu.

231 Kasi beno lendaka ve kukota na Dibuundu ya Nzambi ya moyo. Beno ke butuka na kati ya Yawu, na nzila ya mbotika ya Mpeve-Santu. Mpe ntangu beno me botama na Mpeve-Santu,

bangolo yayi ba me tula kidimbu na kati ya beno, na nzila ya Mpeve-Santu, mpe na yina, “Yandi yina me butuka na Nzambi ke salaka disumu ve.” “Yandi lenda ve.” Yawu yina. Oh, la la!

Beto lendaka tubila yawu kilumbu ya muvimba, mutindu yina ve?

²³² Dibuundu kele Nzutu ya mansweki ya Klisto, yina me butuka na Pema ya Nzambi. Oooh! Beno me bakula yawu? [Dibuundu me tuba, “Amen.”—Mu.] Dibuundu ya Nzambi me butuka na Pema ya Nzambi. Nzambi pemaka Pema na kati ya mabulu ya mbombo, ya Adam, na kimpeve, mpe yandi kumaka moyo yina ke zinga. Beno me zaba ti ba-pentecotiste, to Dibuundu ya kieleka ya pentecote, me butuka na Pema ya Nzambi? [“Amen.”]

²³³ Beno bika mu tangila beno kima mosi, kaka ntangu fioti samu na yawu. Beno bika mu tala, na mwa ntangu fioti. Santu Jean, mu ke kwikila, kisika mu ke kwenda. Beto ke tala kana Dibuundu ya Nzambi kele mutindu yina, to ve. Santu Jean, beto tala, mu kwikila ti ya kele 16, 19; 20. Mbote mingi. Awa mu ke kwikila ti beto ke mona yawu, kaka awa. Mbote mingi. Beno bika mu tangila beno, mpe beno tala kana Dibuundu me butuka na Pema ya Nzambi, to ve, mutindu Adam vwandaka na mbandukulu. Beno tala mbote.

Mpe na nkokila ya kilumbu yayi, yina vwandaka kilumbu ya ntete ya sabala, bielo yina bisika vwandaka bilandi vwandaka ya kukanga samu na boma ya ba-Juif, Yesu kwisaka mpe telemaka na kati-kati ya bawu mpe tubaka na bawu, Ngemba kuvwanda na beno.

Mpe ntangu yandi tubaka mutindu yina, yandi talisaka... bawu maboko ya yandi mpe mpanzi ya yandi. Kisika... Na yina bilandi vwandaka na kiese, ntangu ba monaka Mfumu. Mpe Yesu... .

Mpe na yina Yesu tubaka na bawu diaka, Ngemba kuvwanda na beno: mutindu Tata me fidisa munu... . Munu mpe ke fidisa beno.

²³⁴ Beno tala. Tata yina fidisaka Yandi vwandaka na kati ya Yandi. Mpe Yesu, ntangu Yandi ke fidisa kilandi mosi, Yandi ke vwanda na kati ya Yandi. Yandi yina fidisaka Yandi; Nzambi.

Mpe ntangu yandi tubaka mutindu yayi, yandi fulaka mupepe na zulu ya bawu, mpe tubaka... Beno baka Mpeve-Santu:

²³⁵ Dibuundu, yina me butuka na Pema ya Nzambi! Ntangu ntela yayi ba me yidika yawu kuna, ya me kubama, Pema ya Nzambi ke na kuluta na zulu ya bawu, “Beno baka Mpeve-Santu,” na yina beno kele mwana ya Nzambi. Beno lendaka kukota na konso kima yina beno me zola, kasi beno ke butuka na kati ya Dibuundu ya Nzambi ya moyo, yina me butuka na

Pema ya Nzambi. Nzambi pemaka na zulu ya bawu, mpe tubaka, “Beno baka,” fiou, “Mpeve-Santu.” Oh, la la! Yawu yina.

²³⁶ Ya kele ve, “Beno kwisa kota, beno tula nkumbu ya beno kuna.” Mpe na bamadia ya beno ya nkokila yina ba ke pesaka soupe mpe nionso yankaka, beno ke kota na club mosi. Beno lendaka kukota na club ya ba-Methodiste, club ya ba-Baptiste, club ya ba-Presbytérien, club ya ba-Catholique, to club ya ba-Pentecotiste, konso kima yina beno ke zola kukota, kasi ke kota na club.

²³⁷ Kasi ntangu beno me kuma mwana ya Nzambi, beno me butuka na Pema ya Nzambi. Amen. Mu ke sala mbote na kubika yawu, ntangu yayi. Mbote mingi.

²³⁸ Luzingu ya Nzambi kele na ntangu yina na kati ya beno, Yesu tubaka. Beno vingila fioti. Yesu tubaka, “Mu kele Vinu. Beno kele divala.”

²³⁹ Beno tala ntangu yayi. Samu na yinki ba vwandaka zola kuswanisa Yesu? Diambu ya bawu na Yesu vwandaka, samu Yandi mutindu Muntu vwandaka kukisala Yandi mosi Nzambi. Yandi vwandaka Nzambi. Nzambi vwandaka na kati ya Klisto. Beno me mona? Mpe Yandi tubaka na bawu. Yandi tubaka, “Mpe beno tala ve na Munu. Ya kele Munu ve. Ya kele Tata ya Munu, mpe Yandi kele na kati ya Munu.” Oh! Beno me mona?

²⁴⁰ Ntangu yayi, ba vwandaka tala na mwa nzutu yina butukaka na Marie. Beno me mona? Yina vwandaka ve Nzambi. Yina vwandaka Mwana ya Nzambi, kasi Nzambi vwandaka na kati ya Nzutu yina. Ya vwandaka Nzambi. Yandi tubaka, “Kana Mu ke sala ve bisalu ya Tata ya Munu, na yina beno fundisa Munu. Kasi nani na kati ya beno lendaka kufundisa Munu na disumu, kukondwa lukwikilu na Ndinga? Wapi Ndinga Nzambi tubaka yina me salama ve na Munu?” Disumu kele kukondwa lukwikilu. “Nani na kati ya beno lendaka kufunda Munu na disumu?” Disumu kele kukondwa lukwikilu. “Beno talisa Munu. Kana Mu ke sala ve bisalu ya Tata ya Munu, na yina beno kwikila ve na Munu. Kasi kana Mu ke sala bisalu ya Munu. . . Kana beno lendaka ve kukwikila na Munu, beno kwikila bisalu yina Mu ke sala, samu ya ke sala kimbangi ya Munu.” Na nzonzolo yankaka, “Tata kele na kati ya Munu, ke sala kimbangi ya Yandi mosi.” Samu, “Nzambi vwandaka na kati ya Klisto, ke vutula ngwisani ya yinza na Yandi mosi.” Beno me bakula yawu? [Dibuundu me tuba, “Amen.”—Mu.]

²⁴¹ Mbote, ntangu yayi, Luzingu yina kele na kati ya Vinu kele diaka na kati ya divala. Wapi mutindu beno ke kota na kati ya Yawu? Beno lendaka ve kusala yawu.

²⁴² Mu monaka yinti mosi ntama mingi ve, na kilanga ya Mpangi Sharrit na Arizona, yina vwandaka na bambuma yivwa ya malala ya luswaswanu na zulu ya yawu. Yinki ya vwandaka? Ya vwandaka—ya vwandaka yinti ya malala, yinti ya malala navel.

Kasi ya vwandaka—ya vwandaka na citron, mandarine, tangelo, mpe pamplemousse. Ya vwandaka ya mutindu na mutindu. Mu telamaka, mu talaka yinti yina. Mpe mu tubaka, “Mpangi Sharrit, nge ke zola kutuba na munu ti yinti yina kele yinti ya malala?”

Yandi tubaka, “Ya kieleka.”

²⁴³ Mpe mu tubaka, “Mbote, wapi mutindu? Wapi mutindu ya lendaka salama?” Mu tubaka, “Mu ke mona pamplemousse *awa*, mpe mandarine *awa*, tangelo *awa*, mpe citron *awa*, mpe bambuma yayi nionso yankaka. Wapi mutindu ya lendaka salama?”

Yandi tubaka, “Mbote, beno me mona, ba me namikaka yawu.”

²⁴⁴ “Oh!” Mu tubaka, “Mbote, mu ke zola kuyufula nge kima mosi. Ntangu yayi, beno ke buka pamplemousse yayi mpe citron yayi. Ntangu yayi, na mvula yina ke kwisa, yinki ke basika kuna? Ya ke basisa ya kieleka dilala.”

“Oh, ve.” Yandi tubaka, “Ya ke basisa citron. Beno me mona?”

“Oh,” mu tubaka, “matondo na nge.” Beno me mona?

Beno lendaka ve kusala yawu. Beno lendaka ve kukota na yawu.

²⁴⁵ “Kasi,” yandi tubaka, “konso ntangu yina yinti yayi ke kununa na mvula mosi mpe ya ke basisa mavala ya malu-malu, ya ke basisa malala, ntangu vinu yawu mosi ke basisa mavala.”

²⁴⁶ Mpe yina beno ke meka na kusala kele kukotisa bamambele na kati ya Yandi, mpe beto kuzinga na nsi ya nkumbu ya Buklisto. Samu, beto kele, mutindu beto ke tubaka yawu ntangu nionso ti beto kele mbuma ya citron, Dibuundu ya Baklisto.

²⁴⁷ Kasi ntangu Vinu Yawu mosi ke basisa vinu, ya ke vwanda mutindu Vinu ya ntete yina Yawu basisaka. Kana Vinu ya ntete yina Yawu basisaka, ba sonikaka Buku ya ba-Actes na manima ya Yawu; kana Yawu ke basisa yankaka, Ya ke sonika buku ya ba-Actes na manima ya Yawu. Ya kieleka.

²⁴⁸ Na yina, beno ke kotaka kaka na ba-club. Kasi ntangu beno me butuka na Vinu . . . Beno kele na mbuma. Ya kieleka. Beno kele na mbuma, kasi yinki beno ke sala na yawu? “Beno kele na busantu ya nganda, mpe beno ke manga ngolo ya yawu.” Beno ke manga bidimbu. Beno ke mambu ya ngitukulu. Beno ke manga Mpeve-Santu. Beno ke manga bandinga ya malu-malu. Beno ke manga ba-vision. Beno ke manga ba-profesi. Beno ke manga kubeluka. Mpe, kasi, “Beno ke kukipesa nkumbu mosi.” Kuyituka ve Mpeve-Santu tubaka, “Ngolo mosi, bimvuka ya bantu, ya kifuluka na bankumbu ya kufinga Nzambi, ya kieleka, ba ke kukibokila bawu mosi, ‘Baklisto.’” “Na busantu ya nganda, kasi ke manga ngolo ya yawu. Kwenda ntama na bawu,

samu ya kele na kati ya bawu na bayina ke twadisa bakento yina kele na mpeve ya kulemba mpe ya kukangama mpe ya kifuluka na bampusa ya mutindu na mutindu.”

²⁴⁹ Ba-organisation ya mutindu na mutindu! Dibuundu kele ya kifuluka na ba-association kimvuka *yayi*, mpe kimvuka *yina*. Wapi mutindu samu na association ya Yesu Klisto? Beno me mona? Beto kele na bima yayi nionso yankaka, mpe beto me pesa kizitu na dibuundu. Ntangu yayi yawu yina.

Beno lendaka ata fioti ve kukota na Dibuundu.

²⁵⁰ Beno ke kotaka na club. Beno kele mambele ya club, ya kimvuka ya bantu, kaka mutindu club kele. “Beto ke kwikilaka na *yayi*. Beto kele na bantumunu ya beto. Beto kele na binsweki ya beto, mpe nionso yina.” Beno ke sala mutindu mosi, beno ke kota kaka na dibuundu ya nkumbu.

²⁵¹ Kasi beno lendaka ve kukota na Dibuundu. Beno me kotaka na club ya bamambele, kasi Dibuundu, samu beno me butuka na kati ya Dibuundu yina mpe Vinu Yawu mosi.

²⁵² Ntangu yayi beno vingila fioti. Beno tala. Mu ke sukisa, na manima ya mwa ntangu fioti. Beno tala. Beno lemvokila munu. Mu—mu zolaka ve kutuba mutindu yina. Beno tala mbote. Beno tala.

²⁵³ Kana Nzambi vukisaka Kento yayi ya makwela kintwadi na Mpeve yina, na yina Ya ke vukisa muntu kintwadi na Mpeve yina, beno me mona, na yina beno me butuka na kati ya Kimfumu yina. Mpe na yina Luzingu ya kieleka yina vwandaka na kati ya Dibuundu *yayi*, kele na Dibuundu *yina*, mpe *Yina, Yina, Yina, Yina*. Mpe Luzingu ya kieleka yina vwandaka na kati ya envelope, Vinu, Yesu, kele na kati ya mambele yina Yandi me basisa. Nkembo! “Na mambu yina Mu ke sala, bisalu yina Mu ke sala, beno mpe ke sala yawu.” Ya kele na mambele ya kieleka ya Nzutu ya Klisto, ya kele ve mutindu ya nkumbu yina ba me namika na Yawu. Bisalu yina muntu ke salaka yawu yina ke talisa kisika yandi me katuka. Luzingu ya yandi ke siamisa yina yandi kele.

²⁵⁴ “Wapi mambele beno kele? Wapi nzutu beno kele?” Nzutu ya Klisto. “Mbote, wapi kisika beno kotaka na Yawu?” Mu salaka yawu ve. Mu me butuka na Yawu. Beno me mona? Mu me butuka na kati ya Yawu.

²⁵⁵ Beno fwana ve kutuba na bawu. Ba me zaba yina me salama. “Beno, wapi mutindu beno lendaka kupelisa mwinda mpe kubumba yawu na nsi ya kitunga?” Yandi tubaka. Beno me mona? Ve, ve.

²⁵⁶ Ntangu beno me butuka na kati ya Kimfumu ya Nzambi, na yina ya kele Luzingu, Luzingu yina kaka vwandaka na kati ya Yesu. Na yina beno ke tala na mioyo. Na yina beno ke bondila ve bantu, samu na kukwisa na autel. Beno fwana ve kubondila

muntu mosi, samu na kukwisa kuvukana na bayina kele na autel. Yinga. Bima ke salama yawu mosi kaka, samu Ya me niemama na kati ya beno. Beno kele kima ya Nzambi. Ba me tula beno kidimbu na Mpeve-Santu.

Ntangu yayi beno me zaba yina “Mpeve-Santu” ke zola kutuba?

²⁵⁷ Mu ke zola ve kutuba, “Mu lemukaka na zulu mpe mu bokaka. Mu vwandaka na nsatu ya ngitukulu.” Bima yina nionso kele mbote. Mu lemukaka na zulu mpe mu bokaka, mpe mu vwandaka na nsatu ya ngitukulu. “Mu tubaka na bandinga ya malu-malu.” Mu ke kwikilaka ti Mpeve-Santu ke tubaka na bandinga ya malu-malu. Ya kieleka. “Mu me tendula.” Yinga, tata. Mu ke kwikilaka yawu, mpe. Kasi Yawu yina ve. Yawu yina ve mu ke tubila. Ya lendaka vwanda na mpwasa kisika mosi awa. Ya lendaka vwanda na mpwasa *awa*, na kati ya mvibudulu ya beno.

²⁵⁸ Kana muntu mosi kubula beno na lweka yayi, ya kizizi, beno ke pesa lweka yina yankaka? Kasi beno ke tuba, “Muntu ya mvindu ya luvunu!” Na yina ya kele na mpwasa, kisika mosi kuna, mwa dibulu mosi. Beto ke sala mbote kubika yawu. Mbote mingi. Kasi beno me zaba yina mu zola kutuba.

²⁵⁹ Kasi ntangu ba me tula beno kidimbu na kati ya Nzutu ya Klisto, na yina beno me fuluka na Mpeve, mpe beno kele mwana ya Nzambi.

²⁶⁰ Oh, mu ke zolaka kuvwanda diaka na minuti kumi, samu na kutanga kima mosi awa. [Dibuundu me tuba, “Kwenda na ntuala. Tanga yawu, mpangi-bakala.”—Mu.] Kasi beno lendaka kukangila munu ntima na mwa minuti kumi diaka? [“Yinga.”] Mu ke zola kutanga kima mosi, kaka fioti. Ntangu yayi, ya kieleka, madesu ke zika ve. Mu ke tuba na beno kaka kieleka, beno me mona, kana beto beto lendaka kaka kutanga yayi na mwa minuti fioti. Ya kele mbote mingi ti mu lendaka ve kubika yawu. Mu kele na bima zole to tatu awa, yina me kwisa na mabanza ya munu, yina mu ke zola kutuba.

²⁶¹ Beto baka Santu Jean, kapu ya 3, yina ke tubila Luzingu ya Kukonda nsuka. Beto tala yina Yawu me tuba samu na diambu yayi ya Luzingu ya Kukonda nsuka, Luzingu ya Nzambi. Ntangu yayi, beno tala awa.

Ya vwandaka na bakala mosi na kati ya ba-Pharisien, na nkumbu ya Nicodème, mfumu ya ba-Juif:

Yina kwisaka kuna na Yesu na mpimpa, mpe yandi tubaka na yandi, Rabbi, beto me zaba ti nge kele mulongisi yina me katuka na Nzambi: . . . ata muntu mosi ve lendaka kusala bimangu. . . kukondwa Nzambi kuwanda na yandi.

262 Ntangu yayi, bawu, bayinzo ya lusambusu ya ba-Sanhédrin, ba zabaka ti Yandi vwandaka Mwana ya Nzambi. Ba zabaka yawu. Mfumu ya bawu vwandaka awa, ke tuba na Yandi, “Beto me zaba ti Nge kele Mulongisi yina me katuka na Nzambi, samu Luzingu yina ya Nzambi ke na kutambula na kati ya Nge.” Beno me mona? “Beto me zaba ti malongi ya Nge me katuka ve na Nge Mosi. Ya kele ya Nzambi, samu Nzambi ke pesaka Yawu.” Beno me mona? “Luzingu ya Nzambi ke tambula na kati ya Nge.” Beno tala mbote ntangu yayi.

Yesu vutulaka mpe tubaka na yandi, Ya kieleka, . . . Mu ke tuba na nge, Kana muntu me butuka ve mbala ya zole, yandi lendaka ve kumona kimfumu ya Nzambi.

263 Oh, la la! “Kana nge me kota ve na dibuundu”? Oh! Beno me mona wapi mutindu ba ke kwenda ntama na Yawu? Beno me mona? Beno me mona?

Yesu, na yina Yesu vutulaka, Ya kieleka, ya kieleka, mu ke tuba na nge, Kana muntu mosi me butuka ve na masa mpe . . . Mpeve, yandi lendaka ve kukota na kimfumu ya Nzambi.

Yina me butuka na nsuni . . . nsuni kele nsuni; mpe yina me butuka na . . . Mpeve kele mpeve.

Kuyituka ve samu Mu me tuba na nge, Nge fwana butuka mbala ya zole.

Mupepe ke kwendaka kisika yawu me zola, . . . Beno me mona, yawu ke kwenda mpe yawu ke vutuka, beno me mona, yawu ke kwenda mpe yawu ke vutuka, beno me mona.

Mupepe ke kwendaka kisika yawu me zola, . . . beno lendaka ve kuwa muningu . . . lenda kuwa muningu kuna, kasi lendaka ve kutuba wapi yawu me katuka, to kisika yawu ke kwenda: ya kele mutindu yina samu na muntu nionso . . . yina me butuka na Mpeve.

Nicodème vutulaka mpe tubaka na yandi, Wapi mutindu mambu yayi lendaka salama?

Yesu vutulaka mpe tubaka na yandi, Nge kele mulongi ya Israël, mpe nge me zaba ve mambu yayi?

264 Beno tala munu diambu yayi, mpangi-bakala, Docteur na Théologie, Docteur na Philosophie, Docteur na Droit, beno me mona, “Mpe nge me zaba ve mambu yayi?”

Ya kieleka, . . . Mu ke tuba na nge, Beto ke zonzila yina beto me zaba, mpe ke pesaka kimbangi ya mambu yina beto monaka; mpe beno me ndima ve kimbangi ya beto.

265 “Beto me zaba mambu yayi. Beto me monaka yawu. Beto me zaba Yawu, kasi beno ke ndima ve kimbangi ya beto.” Muntu yina me kota na Dibundu! Beno me mona?

Kana beno ke kwikila ve, ntangu Mu me tuba na beno mambu ya ntoto, wapi mutindu beno ke kwikila, kana Mu me tuba na beno . . . mambu ya mazulu?

266 Ntangu yayi beno kuwa yayi awa. Beno tala mbote.

Mpe muntu ve me zanguka na zulu, kasi yandi yina me kulumuka na zulu, Mwana ya muntu yina kele na mazulu.

267 Beno kwenda bakula yawu.

268 Beno zaba, kilumbu mosi, Yandi tubaka, “Yinki beno ke banza samu na Klisto? Yandi kele Mwana ya nani?”

Bawu tubaka, “Mwana ya David.”

269 Yandi tubaka, “Na yina samu na yinki David, na Kimpeve, tubaka na Yandi, ‘Mfumu me tuba na Mfumu ya munu, ‘Nge ke wanda na diboko ya Munu ya kibakala?’? Wapi mutindu Yandi lendaka vwanda Mfumu ya Yandi mpe Mwana ya Yandi?’ Muntu mosi ve kuyufulaka Yandi kima yankaka.

270 Na Apocalypse, Yandi tubaka, “Mu kele Nsimbulu mpe Dikanda ya David.” Beno me mona? “Mu kele Vinu mpe Divala. Mu kele mbandukulu. Mu vwandaka na ntuala ya mbandukulu. Mu vwandaka mbandukulu, mpe—mpe mu vwandaka Nsimbulu ya Yandi, mpe.”

271 Ntangu yayi, awa Yandi tubaka, “Muntu mosi ve me kulumukaka na Zulu, kasi Mwana ya muntu yina kele na Zulu na ntangu yayi.”

272 Mama mosi yufulaka munu, kiuvu, kilumbu mosi. Mu tubaka, “Vutula mvutu na yayi samu na munu.”

Yandi tubaka, “Nani Yesu vwandaka sambila, na kati ya disamba ya Gethsémane?”

273 Mu tubaka, “Nani Yandi vwandaka tubila ntangu Yandi tubaka, ‘Muntu mosi ve me zangukaka na Zulu, kasi Yandi yina kulumukaka na Zulu, Mwana ya muntu yina kele na . . . yina kele ntangu yayi na Zulu? Nani?’”

274 Yandi yayi awa, na zulu ya muludi ya yinzo, Yandi ke na kutuba na Nicodème, mpe tubaka, “Mu kele na Zulu.” Ya kieleka? [Dibuundu me tuba, “Ya kieleka.”—Mu.] Beto bika yawu samu na nkokila yayi. Yinki beno ke tuba? [“Amen.”] Ntangu me luta mingi. Oh, la la! Mu ke tuba na beno na kubanza na yawu fioti, na manima ya midi yayi.

275 Wapi mutindu beno ke kotaka na Dibuundu? [Dibuundu me tuba, “Beto ke butuka.”—Mu.] Beto ke butuka. Wapi mutindu? Na Pema ya Nzambi.

Pema na zulu ya munu,
Pema na zulu ya munu;
Mpeve ya Nzambi ya moyo,
Pema na zulu ya munu.

276 Yina kele kisambu ya munu: bika ti Mpeve-Santu kupema. Oh, la la! Na yina, Pema ya Nzambi, yinki Yawu kele? Yina ba me tula kidimbu na kati ya Kimfumu ya Nzambi, na kuzabaka ti, ntangu mu me funguna ntete, mu ke kwikila Yesu Klisto. Yinga.

Na yina, na Lukwikilu ya munu, mu ke bwela ngolo, ngolo ya busantu.

Na manima na ngolo ya munu, mu ke bwela luzabu ya Ndinga.

277 Na luzabu ya munu, mu ke bwela lembami, kukiyala. Mu ke zolaka yawu. “Yinsi ya munu kele nge mu ke yimbila, lwatisa moyo ya munu na kukiyala, na mubu yina ke sema simu na simu.” Beno me mona?

278 Mvibudulu. Oh, la la! Bakumekama. Beno vwanda na boma ve; Satana ke tanga yawu samu na beno. Mu ke na kumata na zulu ya kikalu. Beno me mona? Mu me bwela ngolo, luzabu, lembami, ntangu yayi mu fwana kubwela mvibudulu. Tii na ntangu yayi mu kele ve na Mpeve-Santu.

279 Na yina na manima mu me bwela mvibudulu, mu ke bwela busantu. Beno me zaba yina yawu kele? Kuvwanda mutindu Nzambi. Mu ke bwela yawu. Mu ke tambula ve yimbi. Mu ke zinga mutindu Muklisto ya kieleka fwana kuzinga. Ya kele ve kima yina ba me tula na bantu. Kima mosi na kati ya munu, zola ya Nzambi, ke na kutoka kaka. Beno me mona? Beno me mona? Beno ke tuba ve, “Uh-uh-uh-uh, mpangi, mu zolaka kusala yawu, kasi ntangu yankaka mu lendaka ve kusala yawu.” Beno me mona? Huh-uh. Huh-uh. Nionso yina ke salama, ya ke vwanda kaka kuna.

280 Ya kele Lubutuku. Mu me butukaka na kati ya *yayi*, na kati ya *yayi*, na kati ya *yayi*, na kati ya *yayi*, na kayi ya *yayi*, na kati ya *yayi*, na kati ya *yayi*. Mpe na manima zola ya Nzambi, Klisto, ke kulumuka mpe ke tula kidimbu na nionso yina na kati ya munu, samu na kusalu. Beno me mona?

281 Na yina yinki Yandi ke sala ntangu Yandi ke pesa munu Mpeve-Santu? Yandi ke nata beno na kingenga, Yandi ke tula kidimbu na zulu ya beno. Beno me mona? Beno kele muntu ya kuswaswana na ntangu yina. Beno kele diaka ve, ya yinza. Beno me mona? Beno me lwata bilele ya luswaswanu. Beno me lwata na mutindu ya luswaswanu. Ya kele ve kinkuti yayi ya nganda. Ve, ve. Beno fwana ya ngitukulu mpe yina ke yitukisa, mpe kole ya kubalula na manima, mpe mutindu na nkinzi, nionso yina. Ve, ve. Beno ke sala yawu ve. Beno ke lwata, na nzutu, mutindu yayi. Ya kele kinkuti ya kimpeve yina kele na mfunu. Beno me lwata bilele ya makwela. Nani beno kele?

282 Mutindu Yesu, beno tala, ba fikaka Yandi na kivudi, mpe Yandi sobaka kuna na ntwala ya bawu, mpe bilele ya Yandi vwandaka sema mutindu mwini. Yandi vwandaka kuna, Yesu, Nzambi ke na kutula Mwana ya Yandi Mosi. Beno me mona? Na

manima Moise basikaka. Na manima Elie basikaka. Mpe Pierre tubaka, “Nge zaba, ya kele—ya kele kima ya mbote na kuvwanda awa.” Beno me mona mutindu ya kimuntu? Yinga. Oh, kima ya mazulu salamaka! Yandi tubaka, “Beto tunga ba-tabernacle tatu. Beto tunga mosi samu na Moise, mpe mosi samu na Elie, mpe mosi samu na Nge.”

283 Mpe na ntwala yandi manisa na kutuba, Nzambi kangaka bima nionso, Yandi tubaka, “Yayi kele Mwana ya Munu ya luzolo. Bima yayi nionso mu lombaka na Moise, yina mu sonikaka na musiku ya Moise; kieleka na nzila ya baprofete; Yandi lungisaka yawu nionso. Beno kuwa Yandi. Mu ke bika kisika ntangu yayi. Beno kuwa Yandi kaka. Beno kuwa Yandi kaka.” Oh, la la! Yinki diambu yayi ya kitoko!

284 Na yina, ntangu beto me sala nionso ba me lomba, mpe beto me fuluka na bangolo ya Nzambi mpe bima ya Nzambi, na yina Mpeve-Santu ke kulumuka mpe ke tula beto kidimbu na kati ya Kimfumu. Beno kuvwanda na boma ve. Bantu nionso ke zaba ti beno me kuzwa Yawu. Beno ke tuba ve, “Mbote, nkembo na Nzambi, mu me zaba ti mu kele na Yawu. Mu tubaka na bandinga ya malu-malu. Nkembo na Nzambi, mu me zaba ti mu kele na Yawu. Mu kinaka na Kimpeve mbala mosi.” Beno ke tuba ve mpova mosi samu na yawu. Muntu nionso ke zaba ti beno kele na Yawu. Beno vwanda na boma ve. Yinga. Ya ke sala kimbangi samu na Yawu mosi. Yandi ke sala ti yawu zabana na kati ya bantu.

285 Nzambi sakumuna beno. Mu ke na kiese na kuvwanda awa na beno na suka yayi, kuvwanda na ntangu yayi ya ngwisani. Beno kuwa, yinzo-Nzambi ya beto kele ya fioti, mpe kasi beto kele ve na bisika mingi ya kuvwanda samu na bantu yina ke kwisaka awa. Beto kele ve organisation. Beto ke kwikilaka mpe beto kele na ngwisani na ba-organisation nionso. Beno ke kwisaka awa samu ti beno ke zolaka kukwisa. Mpe beno, beto ke zolaka beno. Mpe beto ke zolaka ti ba-organisation nionso, muntu nionso. . .

286 Mu ke kwikilaka ti ya kele na Baklisto na ba-organisation nionso yina. Bawu kele bampangi ya babakala mpe bampangi ya bakento kati na Klisto.

287 Na yina, kuna, beto kele ve na bansinga, ya kele ve kukota na kima mosi, kima mosi ve ya kusala kasi kaka kuvwanda Muklisto. Mutindu E. Howard Cadle vwanda tubaka, “Beto kele ve na musiku kasi zola, buku mosi ve kasi Biblia, credo mosi ve kasi Klisto.” Ya kieleka. Beno kwisa kutala beto. Beto ke vwanda na kiese. Beto ke kwikilaka Nsangu ya mbote ya muvimba, konso kitini ya Ndinga. Beto ke kwikilaka kaka mutindu yina. Beto ke bwelaka ve kima mosi na Yawu, beto ke katulaka ve kima mosi na Yawu, beto ke bwelaka ve kima mosi ya organisation na Yawu. Beto ke bikaka Yawu kaka mutindu Yawu kele. Yawu

yina. Mpe beto ke vwandaka ntangu nionso na kiese na kuyamba beno. Beno kwisa mpe beno vwanaka na beto na konso ntangu yina beno me zola. Beto ke sambilaka samu na bambevo. Beto ke kwikilaka konso kima yina Biblia me tuba na kusala. Beto ke “zimbana bakulemba ya beto, beto ke bika yawu na manima, mpe beto ke na kukima mbangu samu na kuzwa musendo ba ke Bokila beto na kuzwa na mazulu.”

²⁸⁸ Ntangu yayi, kima mosi diaka. Beno ke pesa munu muswa na kutuba yawu? Kilumbu mosi na ntwala ya mazusi na suka. . . Beno ke mona yawu kuna na tablo ti, ya kele na vision. Mu kuzwaka vision. Ya vwandaka pene ya ngunga tanu, mutindu kento ya munu kuna na manima me zaba, to na ngunga ya sambanu. Mu vumbukaka. Beto vumbukaka samu na kukubika bana samu na kukwenda na lukolo.

²⁸⁹ Mu ke vwandaka na yawu, na ntangu nionso. Mpe beno nionso me zaba, beno nionso awa, ti ya ke kubwaka ata fioti ve. Yawu, yawu kele kieleka ya kulunga. Beno me mona? Yawu lendaka kubwa ata fioti ve.

²⁹⁰ Mpe mu banzaka ti mu vwandaka muntu ya kulutila kiese mu monaka ntete ve. Mu vwandaka ya kutelama na kati ya mwini, m-w-i-n-i, mpe mu vwandaka—mu vwandaka longa Nsangu ya mbote na kimvuka ya bantu mingi, nkonga ya bantu mingi.

²⁹¹ [Mpangi Branham me zenga fioti—Mu.] Mu zolaka kutala kana ba me kanga yawu na bande.

²⁹² Kimvuka ya bantu mingi, nkonga ya bantu mingi, mpe ba vwandaka ya kuvwanda na kati ya mfinda. Mpe minzenzi ya mwini vwandaka sema na zulu ya bawu, *awa* mpe *kuna*, ba vwandaka kubaka Yawu, ba vwandaka kubaka Ndinga.

²⁹³ Mpe munu, mutindu na mumesanu, ntangu nionso, mu ke longaka mingi, ntangu ya yinda. Mpe mu longaka ntangu ya yinda, tii nkonga ya bantu ke kuma na nzala ya madia ya nzutu. Mpe bawu, bayankaka na kati ya bawu, lembaka. Na yina bawu telamaka, bawu basikaka samu na kukwenda kusosa madia, bawu bandaka na kukwenda.

Mu tubaka, “Beno basika ve. Beno basika ve.”

²⁹⁴ Mu vwandaka na mambu zole ya mfunu mu zolaka kutuba, mu zolaka kutuba, na dilongi ya munu. Mpe Mfumu pesaka yawu na munu. Mpe konso mulongi me zaba, ti ntangu beno me zaba kieleka ti ya kele Nzambi me pesa yawu na beno, beno ke pela samu na kutuba yawu na bantu.

²⁹⁵ Mpe mu vwandaka longa kaka, Charlie, na ngolo nionso mutindu mu lendaka longa, mu vwandaka landila kaka, beno zaba, mpe mu tubaka, “Bima yayi nionso ya nene, *yayi* Nzambi ke na kusala. Beno tala *yayi*. Yandi ke swasikisa mabanza ya bantima. Yinki Yawu kele? Ndinga.” Mpe mu vwandaka

landila mutindu yina. Mpe, oh, mu ke zola kubambuka yina mu vwandaka tuba mpe yina vwandaka dilongi ya munu. Mu lendaka ve kubanza yawu. Beno me mona? Kasi mu vwandaka landila kaka na kulonga.

²⁹⁶ Mpe mu vwandaka mona ti mu vwandaka sala yawu. Mpe ntangu mu vwandaka ya kutelama kuna, ke tala, mpe mu vwandaka mona munu mosi ke longa Yawu.

²⁹⁷ Mpe mu vwandaka longa kaka, na konso muntu yina zolaka kuwa munu. Mpe na manima ya mwa ntangu fioti, mu vumbukaka, beno zaba, mpe mu banzaka, “Nkembo na Nzambi!” Mu tubaka, “Beno tala bima yayi ya kitoko, mpe yayi, yina!”

²⁹⁸ Na mbala mosi, mu monaka ti bantu bandaka na kumonana mutindu bawu kele na nzala ya madia ya nzutu. Mpe na yina ba vwandaka na nzala mingi ya kimpeve, na yina bawu bandaka na kukwenda. Mpe bayankaka na kati ya bawu... [Mpangi Branham ke mekula kubaye—Mu.] Ba bandaka na kukwenda.

Mu banzaka, “Yinki kele diambu ya bawu nionso?”

²⁹⁹ Mpe—mpe mu talaka, mpe ya vwandaka na bankwelani ya bantwenia yina vwandaka luta, pene-pene ya munu. Mu banzaka... Mu tubaka, “Vingila fioti, nkundi ya munu! Beno vingila fioti! Beno ke vutuka diaka ntangu bivudi ya nkokila ke kubwa.” Beno me mona? Mu tubaka, “Beno ke vutuka diaka. Kasi beno bika mu tuba na beno kima yayi ya ntete ya mfunu. Wapi kisika bima yayi nionso ke katuka, bima yayi mu me talisa na beno? Wapi kisika yawu me katuka?” Mu tubaka, “Yawu yayi. Yawu kele na kati ya Ndinga ya Nzambi. Yawu kele MUTINDU ME TUBA MFUMU, nsilulu ya Yandi. Samu,” mu tubaka, “beno nionso ke pesa kimbangi samu na munu, na yayi, na yina lutumu ya munu kele, ‘Kangama na Ndinga.’” Mu tubaka, “Yinki kele diambu ya beno? Beno ke bakula ve Ndinga? Beno fwana kubakula Yawu.”

³⁰⁰ Mpe bayankaka na kati ya bawu tubaka, “Tala, mu ke zola kudia mwa mampa ya fioti,” mpe nionso yina.

³⁰¹ Mbote, mu banzaka kaka, “Mbote, nkembo na Nzambi! Kana bawu ke zola mwa bitini ya mampa, bawu kwenda kusosa yawu.”

³⁰² Na yina mu—mu vutukaka. Mu banzaka, “Oh, kasi, nge me zaba yinki? Bivudi ke kubwa, na mwa ntangu fioti, ntama mingi ve.” Mu tubaka, “Na yina, ntangu kimvuka ya bantu yina ke vukana diaka, mu ke talisa bawu kima ya mfunu, mpe ke tuba na bawu ti bima yina ba me mona munu ke sala kele na Ndinga ya Nzambi, ya kele ve na mwa buku ya masolo to organisation mosi. Ya kele na kati ya Ndinga. Beno me mona? Konso kitini ya yawu, na kati ya Ndinga, samu ba tumaka munu samu na Yawu.”

303 Mu banzaka, “Nge zaba, bawu nionso, ke vutuka, na nkokila yayi, na yina tala yina mu ke sala. Mu ke vutukila, mu ke vutukila fioti.” Beno zaba mutindu mu salaka yawu na bansungi yayi ya dibuundu, kuvutukila yina mu tubaka na ntuala. “Mu ke vutukila yawu, na Ndinga, na manima mu ke talisa kima yayi ya nkembo ya mfunu mingi, ya kitoko.” Mu tubaka, “Wapi ntangu yina ya ke vwanda! Lukumu na Nzambi!” Mpe mu monaka ti munu mosi me kuma fioti mingi, mpe mu kuwaka yayi, “Lukumu na Nzambi.” Mu monaka munu mosi ti mu ke na kuzimbana mutindu *yina*. Mpe mu vwandaka ya kutelama, kuna.

304 Ntangu yayi, tala ntendulu ya yawu. Beno me mona? Kima ya ntete yina mu salaka, mambu yina salamaka, vwandaka ya mansweki samu na bantu, mingi na kati ya bawu. Mu ke tuba ve ti Nsangu ya mbote ya Muvimba mpe basantu ya Nzambi, kasi, mu ke zola kutuba, mingi na kati ya bawu. Mpe beno ke zolaka ata fioti ve kutala na yinza, kosmos, mutindu Nsangu ya Nzambi. Ntangu beno ke kwenda mpe beno ke tuba . . .

305 Mutindu Boze tubaka, “Mu ke vwandaka ntangu nionso . . .” Yandi tubaka, “Mu lotaka, bamvula me luta, ti Nzambi ke fidisa munu na Chicago mpe Chicago ke ningana samu na nkembo ya Nzambi.”

Mu tubaka, “Joseph, Yandi me salaka yawu ntete.”

“Samu na yinki,” yandi tubaka, “ba me ningisaka yawu ve kubanda na ntangu ya Moody.”

306 Mu tubaka, “Yayi? Mu ke tubila Dibundu. Bayina kele kuna na nganda kele bantu yina ke kufwa. Ya kele kaka putulu ya ntoto, nkonga ya bantu yina ke tambula na babala-bala, ba-Jézabel yayi me tula maquillage mpe bima nionso yina.” Mu tubaka, “Bayina kele kuna na nganda. Ba-club yina ya nene ya ntama mpe bima nionso yina ke ningana mpe ke kubwa na babala-bala kuna.” Mu tubaka, “Yandi ke tubila Dibundu. Dibundu yina monaka luzayikisu ya Yesu Klisto me monisama pwelele, mpe ba ke zaba Yawu. Ba lendaka ve kuvwanda kumi na tanu na Chicago. Ba ke vwanda ve kumi na nsungi yayi, kuna na mbanza ya muvimba ya Chicago, ke basika.”

307 Beno me banzaka ntete na yawu? “Mutindu ya vwandaka na bilumbu ya Noé, mutindu yina ya ke vwanda na Nkwizulu ya Mwana ya muntu, na ntangu yina mioyo nana vulukaka.” Uh-huh. Bantu yikwa basikaka na Sodome? Beno me mona yina mu ke zola kutuba? Mu ke tula ntembe ti ya ke basika bantu diboko mosi ya kifuluka. Beno me mona?

308 Kasi Dibundu Yawu mosi me kuzwa kuningana. Ba me zaba yawu. Bawu zabaka Ndinga. Bawu monaka Ndinga ntangu Yawu kumaka nzutu, mpe bawu simbaka Yawu. Ntangu yayi beno tala yawu muniti mosi, ntangu yayi.

309 Mpe Nsangu yayi ya ntete, ntangu bawu monaka Yawu, bantu nionso wisanaka na Yawu, bawu tubaka, “Oh, nkembo

na Nzambi! Oh, kana mu lendaka kumona *yayi*, *yina*, mpe *yankaka*.” Mpe bawu ke kwenda kaka, mutindu bawu kotaka. Beno me mona?

³¹⁰ Mpe ntangu yayi bawu ke banza, “Mbote, mu me zaba ve. Wapi kisika beno ke kota? Kana mu me kota ve na *yayi*, ya ke vwanda mutindu *yayi*. Mpe ba ke basisa munu na nganda, kuna, mpe *awa* mu ke vwanda na kima mosi ve.” Bampangi vwandaka mpe tubaka, “Mbote, yinki mu ke sala kana mu. . .?” Beno me mona kuna? Ba ke telama mingi ve samu na kundima ti Yawu kele Ndinga yina Nzambi silaka, me monisama. Beno me mona? Mpe ba kwendaka kwa bawu.

³¹¹ Kasi, beno vwanda ve na boma, bivudi me kuma pene-pene mingi, beno me mona, ntangu mu ke vutuka na kilanga ya kumwangisa nsangu.

³¹² Beno ke bambuka moyo, na nkokila yina, na Nsangu yina Yandi pesaka munu kuna ntangu mu vwandaka tula ditadi ya nsongi? Ya kele kieleka. Yandi tubaka, “Sala kisalu. . .” Yandi tubaka, “Ntangu nge ke basika na vision yayi, tanga Timothée ya Zole kapu 4.” Beno zaba, ya kele kuna na kati ya ditadi ya nsongi, bamvula makumi tatu na tatu me luta.

³¹³ Yandi tubaka, “Sala kisalu ya évangéliste, sadila mbote ministere ya nge. Samu ntangu ke kwisa yina bantu ke zola diaka ve na kuwa Malongi ya kieleka; kasi bawu ke sadila bansatu ya bawu mpe ke kutika pene-pene ya bawu nkonga ya milongisi yina ke zabisa bawu mambu yina bawu ke zolaka na kuwa, Bawu ke kanga makutu ya bawu samu na kuwa ve Kieleka; mpe ke zibula yawu. . . samu na kuwa bandongosolo ya luvunu.” Kana yina me salama ve, mpova na manima ya mpova! [Kisika ya mpamba na bande—Mu.]

³¹⁴ Kasi, beno bambuka moyo, kuna, na nkokila yina, mu tangaka yawu nionso ata fioti ve. Bamvula makumi tatu na ndambu yina mu ke longaka na tabernacle yayi, ata na ntangu mosi ve mu me tangaka ntama na yawu, mpe mu zaba ve samu na yinki.

³¹⁵ Mu vwandaka kukiyufula mbala mingi, tii, kilumbu mosi, mu monaka kisika Yesu bakaka Mukanda mpe bandaka na kutanga, mpe Yandi tangaka kati-kati ya profesii, mpe sukisaka, mpe tubaka, kuna na Capernaüm, Yandi tubaka, “Mpe bubu yayi, profesii yayi me lungisama.” Samu na yinki Yandi tangaka nionso ve? Ya ke salama na Nkwizulu ya Yandi ya zole. Beno me mona?

³¹⁶ Mpe mu tangaka yawu kuna, kukondwa kuzaba. Mu bakaka yawu, mpe ya vwandaka kuna, kaka na ntwala ya munu, na Southern Pines, na Caroline du Sud. Na suka yina, mu vwandaka ya kutelama kuna na nganda, mu vwandaka solula na Joseph Boze, mu vwandaka ya kuyekama na lweka ya tomabilu, Mu simbaka yawu. [Mpangi Branham me fina misapi ya yandi—Mu.]

Paul tubaka, “Mu. . . Bantu nionso me losa munu. Ata muntu mosi ve me bikala na munu. Demas me yambula munu; samu na zola ya yinza yayi. Mpe munu ntangu yayi. . .” Beno tala. “Mpe kisadi ya bisengo me sala munu yimbi mingi.”

³¹⁷ Beno tala yina Demas fwana banza: “Na yina, mu monaka Paul ke longa Nsangu ya mbote mpe ke belusa bambevo. Mpe tala yandi yayi, yandi mosi, ke na kubela, yandi ke na kutambula na dokotolo, Luc. Bisika nionso yandi ke kwenda, yandi ke tambula na dokotolo, yandi yina ke longaka kubeluka ya Kinzambi. Na yina, mu monaka yandi me kufwa meso ya bakala mosi. Yandi tubaka, ‘Mfumu kusemba nge, mpe nge ke vwanda mpofu na ntangu mosi.’ Mpe yandi ke bika kisadi mosi ya bisengo kubasisa yandi na lukutakanu. Mu banza ti yandi me zimbisa ngolo ya yandi ya kufwa meso ya bantu. Oh, yandi me zimbisa ngolo ya yandi ya kubeluka ya Kinzambi. Nzambi me yambula yandi.”

³¹⁸ Mu ke banza ve ti Demas kwendaka na yinza, samu Demas vwandaka na. . . Beno me zaba disolo. Yandi vwandaka na dibuta ya nene, ya bumvwama. Mpe yandi zolaka kukwenda na nkonga ya bantu yina.

³¹⁹ Kasi, Paul, mwa Paul ya mputu. Yinki ya vwandaka? Nzambi ke bikaka ntangu nionso ministere kukwenda mutindu yina, na manima Yandi ke lwatisa yawu.

³²⁰ Yandi bikaka Yesu kukuma na kisika yina. Beno tala kuna. Ntangu Yandi lendaka vumbula bantu ya kufwa, ntangu Yandi lendaka sala konso kima yina Yandi zolaka kusala; mpe Yandi bikaka soldat Romain kubenda mandefo ya Yandi na kizizi, mpe kulosila Yandi mate na kizizi. [Mpangi Branham me sala mutindu ba ke losaka mate—Mu.] Ba bulaka Yandi na. . . Ba tulaka kitenda ya lele na kizizi ya Yandi, mpe tubaka, “Ntangu yayi, Nge zaba, ba me tuba na munu ti Nge kele Profete.” Bawu nionso telemaka kuna na bafimbu, mpe ba bulaka Yandi na yintu. [Mpangi Branham me sala mutindu ba ke bulaka fimbu.] Bawu tubaka, “Ntangu yayi tuba na beto nani me bula Nge.” Yandi zabaka nani bulaka Yandi. Uh—huh. Ya kieleka. Yandi zabaka yawu. Beno me mona? Kasi ba kubamaka samu na kulwatisa ministere ya Yandi.

³²¹ Ya ke kumaka ntangu nionso na kisika yina ya ke monana mutindu ya kele kieleka ya kulemba, ya kulemba mingi, ntima me kusuka, ya kele na ntangu yina Nzambi ke lwatisa yawu.

O Mfumu, bika yawu kusalama. Bika yawu kusalama, Mfumu.

Beto kulumusa bayintu ya beto.

Mu zola Yandi, mu zola Yandi
Samu ti Yandi ntete. . .

Ntangu yayi beto sambila Yandi. Beto vwandaka na malongi ya mpasi.

Mpe futaka mpulusu ya munu
Na yinti ya Calvaire.

322 Beto telemisa maboko ya beto ntangu yayi na Yandi.

Mu . . .

Ntangu yayi beno vwanda kati na Mpeve, beno me mona,
“Mu zola Yandi.”

. . . Mu zola Yandi
Samu Yandi zolaka munu ya ntete.
Mpe futaka mpulusu ya munu
Na yinti ya Calvaire.

323 Ntangu yayi, beto telama, beto nionso.

Na mwa nkunga ya beto ya kubasika, beto ke yimbila nzila ya ntete, beto ke pesana mbote mosi na yankaka; nzila ya zole, beto ke yimbila yawu na Nzambi. Mbote mingi. Mpe na yina beto ke basika.

Ntangu yayi, beto yimbila.

Baka Nkumbu ya Yesu na nge,
Nge mwana ya mawa mpe ya kiadi;
Yawu ke pesaka nsayi,
Bisika nionso Yawu ke kwenda.

Nkumbu ya ntalu, Oh Nkumbu ya mbote!
Kivuvu ya ntoto mpe nsayi ya Mazulu;
Nkumbu ya ntalu, Oh Nkumbu ya mbote!
Kivuvu ya ntoto . . . ya Zulu.

324 Ntangu yayi, beno bambuka moyo na yawu, ntangu yayi. Mu ke lomba na mwa mpangi-bakala, yina kele awa, yina mu me kutana na yandi na kivinga na mwa ntangu fioti; mpangi-bakala ya ntalu ya ntwenia, missionarye ya ba-Assemblée de Dieu yina ke salaka kuna na ntoto ya kuyuma; mu me zimbana nkumbu ya yandi, mu ke lomba yandi, na kubasisa bantu na kisambu na ntangu beto ke yimbila nzila yayi ke landa: “Baka Nkumbu ya Yesu na nge, mutindu kinwaninu ya ngolo; mpe ntangu bampukumunu ke kwisa, niunguta Nkumbu yina na kisambu.”

325 Beno tala mbote bampeve ya yimbi ke basika. Beno me mona?

326 Ntangu yayi, beno bambuka moyo: “Baka Nkumbu ya Yesu na nge, mutindu kinwaninu ya ngolo; mpe ntangu bampukumunu ke kwisa, beno telama, mpe beno niunguta Nkumbu yina ya santu na kisambu.” Beno tala mbote yina ke salama. Mbote mingi. Beto nionso kintwadi ntangu yayi.

Baka Nkumbu ya Yesu na nge,
 Mutindu kinwaninu ya ngolo;
 Ntangu bampukumunu ke kwisa niungu-...
 (Yinki veno ke sala, ntangu yayi?)
 Beno niunguta kaka Nkumbu yina ya santu na
 kisambu.

Nkumbu ya ntalu, (Nkumbu ya ntalu,) Oh
 Nkumbu ya mbote! (Oh nkumbu ya kitoko!)
 Kivuvu ya ntoto mpe nsayi ya Mazulu;
 Ya ntalu... , (...?....beno me mona mwana-
 kento yayi ya ntwenia...?....) Oh Nkumbu
 ya mbote! (Kwisa awa, cherie.)
 Kivuvu ya...

³²⁷ Na yina beno me telama awa: Na ntangu me luta mu
 vwandaka na tabernacle, awa (Mama ke landila na kuseka mpe
 yandi talisa kaka na bébé.), bébé yayi vwandaka na appareil
 orthopédique. Yandi yayi, ke na kukima mbangu, mpe yandi
 ke na kusakana mbote bubu yayi. Ya kele ve kitoko.? Lukumu
 na Mfumu. Ntangu yayi, beno tala mbote awa: Cherie, lemuka
 mpe talisa bawu, kuna, wapi mutindu nge lenda kukima mbangu
 bisika nionso. Beno me mona?

Oh, Nkumbu ya ntalu, (Beno bambuka moyo,
 Mbundana ya nkokila yayi, ntangu yayi.)...
 Nkumbu ya mbote!
 Kivuvu ya ntoto mpe nsayi ya Mazulu;
 Nkumbu ya ntalu, Oh Nkumbu ya mbote!
 Kivuvu ya ntoto mpe kiesa ya...

³²⁸ Ntangu yayi beto kulumusa bayintu ya beto. Mpe beno
 bambuka moyo balukutakanu ya nkokila yayi, ntangu yayi; mpe
 ya kele nkokila ya Mbundana. Mpe beno nionso kubambuka
 moyo na yina, beno, yina kele Baklisto, beto ke bokila beno na
 kukwisa mpe kubaka Mbundana na beto. Beto ke na kuingila
 bantangu ya nene.

³²⁹ Pasteur ya beto ya ntalu, awa, Mpangi Neville, mpe... Bantu
 yikwa ke zolaka Mpangi Neville? Beno tuba, "Amen." [Dibuundu
 me tuba, "Amen."—Mu.] Beno kuwa, bampangi, beno kuwa
 munu mutindu beno... mutindu mosi ya ba-pasteur awa na
 tabernacle: Beno kangama na Mpangi Neville. Beno vwanda na
 yandi. Beno me mona? Yandi kele kisadi ya Klisto. Beno vwanda
 na yandi. Biblia me tuba, "Beto vukana kintwadi: kulutila mingi
 mutindu beno ke mona ntangu yayi ya yimbi me belama." Beno
 kwisa na balukutakanu, beno kwisa; beto vukana mpe beto
 vwanda pene-pene ya pasteur ya beto. Beno me mona? Beno
 vwanda na...



BANKUMBU YA KUFINGA NZAMBI KNG62-1104M
(Blasphemous Names)

Nsangu yayi ya Mpangi William Marrion Branham, kulongamaka na Kingelesi, na Lumingu na suka, na kilumbu ya 4 ya Ngonda ya kumi na mosi, na mvula 1962, na Branham Tabernacle na Jeffersonville, Indiana, U.S.A., yina bakamaka na bande manietiki mpe basisamaka na muvimba nionso na buku na Kingelesi. Lubangulu yayi na Kikongo basisamaka na buku mpe ba kabulaka yawu na Voice Of God Recordings.

KIKONGO-KITUBA

©2022 VGR, ALL RIGHTS RESERVED

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org

Luzabusu samu na kubasisa mikanda

Muswa nionso kele ya yandi. Muntu nionso lenda kubasisa buku yayi na masini ya yandi ya yinzo samu na yandi mosi, to kukabula yawu ya mpamba, mutindu kidadilu samu na kumwangisa Nsangu ya mbote ya Yesu Klisto. Ba lenda tekisa buku yayi ve, kubasisa yawu na lutangu ya kulutila mingi, kutula yawu na site internet, kubumbisa yawu na kibumbulu ya bansangu, kubangula yawu na bandinga yankaka, to kulomba mbongo kukondwa muswa yina me sonama na Voice Of God Recordings®.

Na yina me tadila bansangu ya kulutila mingi to samu na yina me tadila bisadulu, beno sonikila:

VOICE OF GOD RECORDINGS
P.O. Box 950, JEFFERSONVILLE, INDIANA 47131 U.S.A.
www.branham.org